

LIFE OF CHRIST

(Jesu Christa hinkho thusim)

Paominlen Kipgen (PK) M.Th

INTRODUCTION

Masang'in Pathen aphant phat chan jat chom chomin themgaoho kamin pu le pate henga thu anaseijin; chule thilsem ho'a konnin mihem te lah'a ana kilah'in (Ps. 19:1-4; Rom. 1:20) mihemin jong alungsungu se le pha hetna'a kon Pathen aum monge ti ana heuvin ahi (Rom. 2:14-15). Hichu sap paova "partial revelation" (kimlouva kiphondohna) akiti. Ahin tulai ni nunungin vang Jesu Christa'a kon thu aseijin (Heb. 1:2) chamkim tah'in akilah tai. Christa hi Pathen kiphon dohna chungnungpen "supreme revelation" ahi. Hiche simmun hi Jesu Christa hinkho, anatoh chule athuhil chomlam tah'a kistem ahi.

BUNG – 1

JESU CHRIST THUSIM KIMUNAHOA.

GOSPEL

Jesun autobiography (athusim) ana jihpoi. Ahin gospel 4 hohi athusim ihetnao hung kondohna thupi pen (priMariam source) ahi. Ahin gospel hohi biography (mikhat thusim kisun) ahipoi. Jesu leiset chungu kum 33 ½ tobang anaum in ahin akijih hin kum lhomcha sunga phat chomcha sung bou ahop'in, adang athip hel jenge. Ajehchu abonnin kisun le leiset hin adol louding ahi (Jn. 21:25). Chuleh a biography kisun hilouva kipana thupha (Gospel), tonsot hinna inei theina diuva kisun joh ahi jeh ahi (Jn. 20:31).

Gospel masapen chu Jesu thijou kum 35-45 nunga hung pot pan bep ahi. Ajeh chu:

1. Houbung masaho chun Pathen thu lhangsap (evangelism) le solna/ngansena lenpen (great commission – Mt. 28:18-20; Acts. 1:8) aha khohsah jeh'u ahi.
2. Amaho tahsan danna chu Christa chu hung kit pai dinga angaito jeh'u ahi.
3. Aseijui ho leh aheto'h'a (witness) ho ahin kim nahlai jeh'uva akhoh sah louvu ahi.
4. Seijuihon Jesu chu athusim sut ding ngaito (expect) pumma ana jui lou jeh'uva Gospel hi ana kisun vah lou ahi.

Ahin vaigei tah'a ahin sut kit nao jeh chu:

1. Agel banguva Jesu ahung vah lou jeh (Second coming).
2. Amittah'a muho (eye witness) ho athi gamtah jeh.
3. Gentile te Christian na ahung ha lut jeh'uva Gospel Jesu Christa hinkho le anatoh hi oltah'a ahin sutnu ahi.

GOSPEL ATHUPI/APOIMO DAN(Importance of Gospel)

1. Jesu Christa hechen mong mong ho leh athusim hilchen thei ho'a kon ahi jeh.
2. Jesu ahinge ti asut maimai ju hilouva itobang mi le itobang hinkho mang ahidan asut jeh'u
3. Athusim akhoh sah'u hilouva ajihpau, ana toh amantam dan ajih jeh'u.

MARK: Mark hin athusut hi Solchah Peter'a kon aheto hiding ahin, aman Jesu hinkho thusim anatoh thupi ho asunnin, Jesu hi 'Soh' (servant of Jehovah) tin asunne.

MATTHEW: hin Judaho dinga asut ahin, OT thusei guilhun na tam tah aseijin, Jesu chu ‘Vannoi lengpa, Israel te lengpa Messiah’ ahi tin ahil chennin, Judate lhatdampu ahi atin, Jesu thuhil ho ahaseije.

LUKE: Gentile te dinga asut ahin, Jesu Christa chu ‘vannoi huhhingpu, mihem chapa’ ahi atin, vannoi kinepna hopsogh ding gospel ahi.

JOHN: Hin mihem ahina hasei louvin Jesu chu Pathen chapa ahi tin ahilin Pathen ahina aha tahlange. John ahin thulem aseipon, lhagao lamthu le changval toh kihou limna lampang ahaseije.

B. PAUL LEKHATHOT

Paul lekhatot hohi Gospel ho sanga kijih masa jo ahi. Paul in Jesu Christa aum monge ti atestimony’a konin aphochene. 1 Cor. 15:8-9; 9:1; Phil. 3:1; Gal. 1:1 ho ahin ahina leh athuhil hi Jesu athou doh kitpa’a kon ahi atin, mun tamtah’a Jesu hi David chilhah (Rom. 1:3), mihem ahidol le dan noiya hing ahidan (Gal.4:4), Abraham to akimat dan (Gal. 3:16), Anthang jon chung chang (1 Cor.13:23-26), athi, ahin, athodoh le akilah dan (1 Cor. 15:3-8) aseijin; hicheho ivet leh Paul hi Jesu Christa hinkho chung chang hetna neilou ahipoi ti akimui. Ahin Paul hin gospel hi jih tho sangin mite ahil lhang le ding akhoh sah jon ahi.

C. LEKHABU DANG DANG

Christian te goh hilouvin Jesu Christa thusim hi midangin jong anaseije. Juda ten ipi dinga Jesu Christa chungchang thusim hi ana hiti seilhomu ham itileh: i) Messiah ahi ti anop lou jeh’uva ahithe channa athu sei lhom ding anop jeh’u ahin, chuleh ii) Lekhajih lam panga hi ana lhahsam jeh’u ahi.

Ahim him in Jesu Christa phatlai tah’a hi Israel te thusim him him jong ana kijih lhom lkeh jenga ahi. Hiche lhom cha lah’a chun Juda Thusimjih Josephus Pharisee ana hi chun alekha bu jih “Antiquities” a chun Jesu thusim jong them cha anasune.

Rome te thusima jong themcha akimun, hiche holah’a chun: Pliny the younger, Bethenia’a Governor pa chun Rome lengpa Trazan lekha athot na’a chun themcha anajaosah’in; Roman historian Tacitus’in Nero lekha athot na’a chun Christian te thusim jong themcha anasut than ahi.

BUNG – 2

JUDA TE LAH’A KILOIKHOMNA PHABEP HO

1. PHARISEE: Hiche thucheng hi ‘parash’ a kon kiladoh hichu “kichomkhen/chomkhen (to separate)” tina ahi. Amaho hi houlam thudol’a kiloi khom “holy one” ti’a hung kipan, Maccabeas toh hung kitho uva Palistine gamsunga Greek chondan (hellisnistic) suhmang som ahivu. Ahin Maccabies hochu Hellenism (greek chondan) toh ahung kijopmat phat uva hiche group hohi hung kichom khen doh’uva atum beh’a midang sanga lamdang jep tah le tomngai tah’a Pathen’a dinga hung kichom khen doh ahivu. Amaho hi lhomcha ahivangun Palistine gam’a mitam jo seiphat ahivu. Jesu khanglai chu Josephus seidanin mi 6000 val ana’umun ahi.

Amaho hin danthu ho khaotah’in asemun, ajui buki gouvin, achuti nalamun Pathen houding sumil leuvin danthu chu ana ngolpiuvin ahi. Amahon Pathen chu dan thuho hoitah’a ijui bukim le alunglhajje ti’a ana tahsan’u ahin, chuche phatlaija dinga chu Themgao dinmuna ana ding ahivu.

Amahohi Pathen khatseh tahsan (monotheistic) ahiuvin, Old Testament apumpin athaneina apomuvin; vantil ho le thilha ho a'um atahsanun; thi nunga hinkho leh thokitna jong atahsanun ahi. Amahon Pathenin mihem hinkho hi akhohsah'e ti atahsanun, ahin mihem hohin atoh dungjui cheh'uva achunguva thil lhung ji ahi ti jong atahsanui.

Amaho hi Missionary lungputah ahiuvin, ahithe i channa Gentile tejong Juda tahsan na'a puilut ding go ho ahiuve. Kivaipohna lam (politics) langa lunglutna anei pouvin, ahin akipum kangse theideh pouve.

Amahon Jesu ana tahsan lounao ajehpen chu Jesun amaho dan (oral law/kamchenga hung kipeson dan, chuleh dan dang dang aneiho) anatahsan loujeh ahipenin ahi.

2. SADUCEE: Saducee hohi chuchelai phatna dinga mi haosapenho, mi inchengpenho, thempu chungnung ho anahiuvin ahi. Amaho hi David le Solomon khanglaija thempu chungnung Zadok (2 Sam 8:17) chilhah, thempu gui hi'in ana kiseijun ahi. Saducee hin epi akoudohna ham ti het ahipoi. Ahin Lekhabu jouse'a amaho hi Pharisee hotoh kidouvin akisun sohkeijin ahi. Amahon gollui tahsan le chondan jouse chu tuhdet ding agouvin, Pentateuch bouhi Pathen thu dihtah'in apomun Pharisee ho tahsan le jui kamchenga hung kipeson dan (oral law), akhang khanga chonna dan (tradition) le danthu hilchetbu ho (Mishnah) chu adouvun ahi.

Saducee ho hin thi nunga hinkho atahsan pouvin, tahsa thokitna jong atahsan pouvin, Thi nunga kipaman (reward) le gotna jong atahsan pouvin, vantil le thilha jong atahsan pouve. Amahon Pathen hin mihem hinkho Mandan hi akhohsah poi atiuvin, mijouse hin adeidei abol thei ahi ti atahsanun ahi.

Amahohi polam muthei thil ho'a alunglutnun (materialistic), kivaihomna (politics) lama akikumun, Rome Govt. toh kitho'in tohmun lentahtah aneijun ahi. Amahon Greek chondan ajuijun, ahaosa theijun, Jerusalem hou'in vekol le asunga natong thempuho ahiuve.

Amahon Jesu ana dounao chu gamsunga panmun lentah tah ho atuhdenjing nomjeh'u ahi.

3. DANTHU SUNHO: Ahung kipatnao hi Ezra khang lai peh hiding'a sei ahi. Amahohi *scribes* akitiuvin, Judate danthu chungu thanei ahiuvin, alhangpi'a Pharisaiho ahiuve. Amahohi *lawyer* (danthuthem) tinjong akiheuvin ahi (Lk. 10:25). Scholarho ahiuvin, danthu chu mipiho hetthei leh jui thei dinga hilchenho ahiuve.

4. ZEALOT HO: New Testament sunga munlhomcha'a bou akimuvin ahi. Jesu seijui Simon chu Zealot anahi (Lk 6:15; Jn 18:40). Josephus chun Jesu to kilhet Barrabbas jongchu Zealot ahi ati. Josephus'in Zealot hohi Galilee mi Judas in ahin phudoh, AD 6 kuma Kai kitamdon theina dinga Rome Govt in minkhum ding ahingonu douna dinga kiphutdoh ahi ati. Amaho hi Pharisee ho to kithojing ahiuvin, Pathen bouvin Judah te chungu vaipohna ding thaneina anei ahi ti atahsanu ahi. Amaho hi gamle nam dinga hinkho phalngam leuva pang ahiuvin, amaho dinga nampi natoh le hou natoh hi kikhen theilou ahi.

5. ESSENE HO: Amaho hi NT sunga akiminphah lou vanguva Josephus (Juda thusim jih) le Philo (Egypt gama um Judah miching/philosopher) lekha jihna'a kon het ahi. Amaho ahung kiha hetdoh dehnao hi 1947 kuma Bible manuscript (kijih doh) "Dead sea scroll" ahung kimudoh'a kon ahi. Hiche lekhabu kimudoh chuleh Essene hohin kimatna hatah'a anei diuva tahsan ahi.

Amaho hi Pharisee le Saducee hotoh thakhatna hung'umdoh hidinga tahsan ahi. Amahohi atuma munthipma khosa (ascetic group) ahiuvin, Death sea pang Qumran mun vela hi tamtah uma anahiuve. Amahohi jineilou dingin akitepmun, chapang pasal ho ana kivah tho jiuvin, ahin kahlah'a

ajinei jong aumthou'uve. Mikhat chun hiche Essene holah'a ajaoding leh anei agou jouse apehlut ding chuleh kumthum sung patepna phat (probationary period) hinalai ding ahi.

Amahohin aphant jouseu hi Danthu (torah) simnan amangun, Pharisee ho sanga sangjo/khohjo ahiuve. Jesu Christa'n hiche kiloikhomho to kiguijopma ana nei le neilou chu Bible'a akimupon, ahin mitamtah 'in gamthipma auma chu ananei tei dinga atahsan ahi. Scholar tamtah'in John Baptist jonghi hiche kiloikhomna'a hi pang hiding atahsanu ahi.

BUNG – 3

CHRISTA PENNA DINGA VANNOI LEISET KIGONTOH

(Phat alhin tah'in... Gal.4:4)

Christianity hi judate lah'a hon neocha'a hung kipan ahijeng vangin leiset chung a houdang jouse sangin amachalin akhang toujon ahi. Pathen in Palistine gam hi kipana thupha kipon jal patna dinga alhen ahin, chuto lhon chun Christa leh Christianity hi leiset chung a'ong hom chum ahipoi. Leiset chung a hou thupi tamtah'in atahsan chu "ima jouse chung a thanei, mihemte hinkho le alhun na ding chung a thanei khat aume" ti ahin, amahon hichu ahou uva, ahenga taoji uva, pungo thilto jong atojuu ahi. Paul in amaho chun kinepna neilou, Pathen hetna jong neilou ahiuve ati. Ahin ijakaihi Pathen'in leiset chung a Christa hungpen nadinga agontup na ahi.

Jesu Christa hungpen phat lai tah chun Rome ten vai ana homun, hiche phat tah chu Paul in ahethet jeh'a Gal. 4:4 na'a Pathen'in mihem lungsunga hi na atoh'a leiset chung jeng jonghi Christa hung na dinga agon tup chet ahi ati ahi.

1. POLITICAL (Kivaihopna) LAM PANGA KIGOTNA: Rome lengam dettah'a ahung kitun doh masanga hi gamsung chu neocha cha, lenggam chom chom, leng chom chomin vai ana poh ahi. Jesu hungpen masang chun hiche atel dih deh ho chu ana kipun khomun lenggam thahat tah khat, lengkhat noiija anaum tan, Jesu pen laitah'a leng chu Caesar Augustus (37 BC – AD 14) ahi. Roman government hin mihem te lungchanga kipun khomna lungthim ape'in, mihem jouse dan khatna kipohna anachepi somui. Hiche hi Roman mite'a kona Jesu pen na dinga apan lah thupi pen le gospel hillhang le na dinga anatoh'u lenpen chu ahi.

Ajeh chu Rome lengpan sepai tamtah alheng doh'in, amaho gang tah'a avale theina dingu, agam gamma gamvaipo kikoiho kahlah'a kihet to gangna ding, chule thilpoh le baina dingin lampi nomtah'in asemin ahileh hiche chu kipana thupha hillhang le ho kalsona dingin agomkom cha ahi.

Chuleh hiche masanga chu gucha michom tamjeh'a gamsunga chu chele vale ana hahsa lneh ahin, hinlah lampi akisemphat na sepai athan jeh'in hiho jong chu abei jin, seijui holeh solchah hon muntina kipana thupha ahil lhang le nao abailam sah lhen jengin ahi.

2. CULTURAL (Chondan le paola ham) LAMPANGA KIGOTNA: Greek lenggam akichai ja Rome ten lengvai ana hon laijun lengvaipo ahijeng vangun chulaija them jilna sangpen chu Athen ahina laijin ahi. Hijeh chun themjil nalam ahin pao le ham langa Rome gamsung jenga jong Greek pao bou an ache jing nalaijin, mijousen jong Greek pao chu ahe cheh'un ahi. Ajeh chu Greek lengpa Alexander the Great (356 – 323 BC) in leiset chung ahin lo'a chu Greek pao hi athe thang pai jeng chuleh miho jousen jong asanthei utoh lhonna chepai jeng ahi. Rome vaihopna noiija mipin Latin pao aman jeng vangun Greek jong atho jing nalaijun, vannoi losoh kipana thupha hin vannoi losoh pao aman angaito lhonna Greek paova bailam tah'a kipana thupha kihil lhang le'a mijousen jong ahethet thei soh keiju ahi. Hitichun Missionary masaho chu pao le hamin ana boi pouvin ahi.

3. PHILOSOPHICAL (Lunggel thuh, hetnasang, chihna) LAM PANGA

KIGOTNA: Greek te akonna gospel machal na dinga apan mun'u thupi kit khat chu ahet gilnao (philosophy) hi ahi. Amahon mihemte chu lunggel thuh tah neipuma leiset chungu le vanna thil hahsa pen penho ngaito nale kholchil na apen, hibang chun mihem in leiset hung kipat dan, leiset thudol, Pathen koi hija ipi ham, mihem hi ipi ham, hoiha hung konham, adih ipi hija adih lou ipiham... tiho angaito'un akholun ahi. Chukitle Greek te hi thil khat het nom nale jah nomna – adeh'a thuthah le thilthah hetnom na aneijun (Acts. 17:23), hijeh chun amahon lunggel thah le hetna thah chu asang painom jengun; hiche hin solchah ho houbung thah phudoh na dingin amasot lleh jengin ahi. Hiti'a kiphtudoh houbung ho chu adeh'in Philippi, Thessalonica, Corinth, Ephesus etc ho hi ahi.

4. RELIGIOUS (Houlam) PANGA KIGOTNA:

Roman te leh Greek te chun pathen pa leh pathennu tampi aneijui; eg. Diana (Arthemies), Venus (ngailut le leiset phatna pathennu), Zeus, Herculis, Hermes chuleh amahon temple tampi jong aneijun, tahsan le houlam chondan jong ahaovun ahi. Ahin amahon chutobang anei jeng vangun alungkim pouvin Rome lengpa jeng jong ahouvun ahi. Hiti'a a pathen houva alung kimlou jeh'un amahon "hetlou pathen" (Acts.17:23) ti jong ahouvun ahi. Jesu phatlai chun mipi lungsunga ahou houhin manlutna (value) ana neipon, mihem in ahouvuvu alungkim lou laitah'uva Jesu hunga ahi.

5. SOCIAL (Mihem kimanchah/kiloikhomna) LAMPANGA KIGOTNA:

Rome gamsunga hin soh ana tam lleh jengin, bazar'a vahle mithum lah'a ni chu soh ahi akiti leovin ahi. Mihem chu gancha sanga noinung jo leuva ana kigel laitah le chamlhat na adei chat laitah'u, chamna, ngailutna, chamlhatna abeilai tah'a Jesu chu ngailut Pathen, ngailutna dimset le chamlhat tah'a hinglou ho dinga chamna lengpa'a hunga ahi. Chukit leh numei chu chamlhat tah'a hinglou chaneid ding maimai ja bou anagelu ahin, hitobang'a genthei tah le lungset umtah'a aumlai tah'uva Jesu chu mijouse dinga tahsalam goh hilouva lhagao lam chamlhatna pe ding leh lungmonna pe dinga hunga ahi.

BUNG – 4

JESU CHRISTA HINKHO THUSIM

Pakai Jesu Christa hinkho thusim hi dan thum'a hopkhen thei ahi

1. Apen masang (Prov. 8:29-30; Jn. 1:1; Phil. 2:6-7)
2. Leiset chungu ahinkho
3. Loupi tah'a Pathen mi (Godman) ahina

APENGLLOU LAI CHRISTA(Apen masang)

Christa tonsotna um jing ahitoh te dinga leiset chungu kum 33 tobang bep ahin hi chom cha ahi. Jesu Bethlehem'a ahung pen hi leiset tahsa'a ahunga anotoh kipatna ahibep'e. Ahin hiche masang peh'a pat'a chu ana umsa, Pa Pathen le Lhagao theng Pathen banga Christa jong kipatna neilou tonsotna anaum peh ahitai. Jn. 1:1 a "Thu chu atillin ana'ume" ati hin Jesu aseina ahin, aseinom chu: Thilsem jouse hung kipat (Gen.1:1) masanga Thu/Jesu chu ana umsa ahitai atina ahi.

OT in avel vellin Christa hung ding thu aseijin, themgao ho seigoh hilouvin Christa vetkah na tamtah maicham thilto, Kut kimandol, Lhambuh/houbuh manchah hole adang danga aume. Themgao thusei 300 val jen in christa ahung hina dingle anotoh ding thudol aseije. Gospel jenga jong 35 veijen OT 'a themgao thusei guilhun aseije. Gahvet thei dingin:

1. Numeinu chilhah hiding (Gen. 3:15)
2. Abraham chilhah hiding (Gen. 12:3)
3. David chilhah hiding (II sam. 7:12-16)
4. Mosi banga themgao hiding (Deut. 18:15)
5. Melchizedek banga thempu (Ps. 110:4; Heb. 6:7)
6. David banga leng (2 Sam. 7:12-16)
7. Bethlehem'a peng ding (Mic. 5:2; Mt.2:1; Lk. 2:1-7)
8. Nungah thenga kon hung pengding (Isai. 7:14; Mtt. 1:18-23)
9. Lhagoatheng thaneina'a thilkidang abolding (Isai.15:2)
10. David lenggam tonsotna aloding (Isai.9:6-7)

Chuche tilouvin Jesu Christa old Testament'a akilahna tampi aummin, hichu theology paova Christopheny/Theophany akitin ahi. OT'a "Pakai Vantil (Angel of the Lord)" kilahji hokhu (Gen. 22:11-18; 31:11-13; Ex. 3:2-5; Num 22:22-35; Judg. 6:11-23; I Kgs. 19:5-7) Christa mihema apen masang ahi akiti.

JESU CHRISTA LEISET NA AHUNG PEN

Jesu Christa pen thusim ivet leh milhamho hin huhhingpu hungpen hi ahe masapenun; tahsa'a anu Mariam jengjong mija umtah bolthei tah ahi dehpon ahi. Jesu pen ja masapen jong kelngoi chingho ahibouvin; Simon ahin, Anna themgao ahin jong vannoi het ahi lhonpoi. Luke kipatna lam ivet leh leiset kivaihomna lam ahin hou lam ahin mibolthei hon Jesu ana mupha pouve.

Bible in jesu Christa pen phat, akum, alha aseipoi. Ahin Matthew ahin Luke ahin apenna mun Bethlehem ahi ati lhonnin (Mtt. 2:1; Lk. 4:7), Matthew seidan in Herod the Great'in Judea gam ana poi atin (2:1), hichu 27-4 BC sung ahi. Luke in athusim hi ahop lenjep'a agah jih nomto lhonnin Jesu pen hi Rome gamvaipohna noi thusim le kivai hopna'a pansan ajih'in: Hichu, Caesar Augustus in leiset chungcheng jouse min sun dinga thu apeh, Syria gamma Quirinius gamvaipo ahilai minsut amasapen ahi (Lk. 2:1-2) ahi ati.

Ahin Joshephus chun Quirinius chu Syria le Judea gamma minla dinga akisol aseina'ah Jesu pen jou AD 6-9 vel lah ahi ati kitne. Publius Sulpicius Quirinius hin Syria gamsung hi AD 6-9 sungin gamvai anapon, AD 6 in Palistine'a minsut na (census) thupi tah anaumin; Joshephus in asut bena'a Judaten kiphin na sangtah aneijun ahi ati (cf. Acts. 5:37). Hiche min lah'a na'a hi Quirinius hin mopohna anei goh hilouvin boina suveng dinga pan alah ahi. Ahin hiche minkhum hi Luke 2 na a kisei khu ahi ding tahsan aumpoi. Ajeh chu hiche hi Jesu pen jou leh Herod thi nung ahitai. Hijeh hin mitam tah'in Luke in Quirinius ati pa hi Soturniuns Syria gamma leng palai dinga hung kisolpa chu hinte atiuvin ahi. Ajeh chu amapa hin 6 BC in min khum na khat anabolin, ahin hijeng jong chu abul abal bei ahikitne. Hinlah Luke hin athusut hi asut khel ahi ding hi tahsan aumpoi.

Archeology (leinoi ja thillui kilaidoh ho kholchilna neiho)'a kon kimu dungjujin AD 1746 lai ja Tivoli (Rome)'a song khat kilai doh/kimudoh chun Rome miloupi khat Syria gamle Phoenicia gamma nivei jen gamvaipo'a anapang jana'a kijih, hichu Augustus khang lai ja hi'ah ahin, amin chet akijih louvangin anatoh doh kijih chu ivet leh Quirinius lou midang hidinga tahsan umlou ahi. Hichu ahile Quirinius hin Syria gamma nivei gamvai anapoh hiding dan ahi. Achitileh Quirinius hi sepai lam panga gamvaipo (military governor) ana hi'a, thusim'a kisun Virus hi kivaihomna lampanga gamvaipo (civil governor) hiding ahi.

Minsut kijih thudol ahin, Egypt gamma lekhabu lui kijih doh kimu dannin leiset chung pumpi hi 8 BC in minsut ding thupuh ana ume atin, anikho le akum hi boipi da thei ahung hi kitpoi. Scholar ho seidanin Jesu pen hi amapenna 6BC hidingin aseijun, Augustus in minkhum ding thu anapeh chu

8 BC ahin, Hijongle Palistine gamma Rome le Herod kah'a boina ana umjing jeh'a kum 2-4 jouva bou minsut che lhathei hiding ahi.

Hijeh hin Christa pen hi amapenna 6 BC hiding, ageipenna 4 BC, Herod thi masang hingei ngei ding ahi. Luke lekha jeh' simhon chulai dinmun ahethem mama jeh'uva chun amaho dinga het hahsa ding ahipoi.

CHRISTIAN CALENDAR

Rome te calendar man chu Roman lenggam hung kipat na pan asim panun, hichu AUC (Anno Urbis Conditae) akitin, hiche in akoudoh chu "Khopi hung kimudoh/kipatdoh kum" atina ahi. Kum jabih 6 laijin Christian Monk Dionysius chun Christian calendar ahin gongin hiche kumsim hi Jesu penna patna simpat hidingin ahin gongin, kum min jong chu Ano Domini (Pakai kum) ati. Hichu Christian ten ana sang pajun adang (non-Christian) honvang asang gei jepun ahi. Dionysius hin akum khotna ah khot khel aumin, ajeh chu AUC calendar apanna ahin suhto ahin, hijeh'a chu BC le AD kikah'a kum 4-6 vel amansah/asumang khan, hijeh'a hi Jesu pen kum hi Christian calendar'a dih tah'a kipe theilou ahitai.

25th DECEMBER HIN IPI MANLUTNA ANEI JEM?

25th December, Jesu Christa pen nikho (Christmas)'a ahung kima patna hi kum jabih 4 apat bou ahi. Hiche hi thusima toh kilhonna boldinga kilom tah leh vetkah dinga lom tah'a hung kibol ahi. Ajeh chu hiche phatlai tah hileh Pathen helou hon vah pathen chun muthim pathen chungga gal ajo na kumhei/golnop anaman jiu ahi. Hijeh'a chu houbung masa hon hiche hi Jesu pen nikho'a mandinga anagonu ahi. Amahon hiche nikho hi thilsem nisa (sun) pathen houni joh hilouva Pathen Chapa (Son) houni le apenni joh'a dinga kilom tah'a anamanu ahi. Chuleh hiche kiman hin houbung mite Pathen houlou ho golnop na'a agajao dinguva konnin jong ahoi dohsah goh hilouvin Pathen'a dinga Pathen houna'a amanu jong le ahoijoi atiu va ana bolpatnu ahi akiti.

JESU NUNGAH THENGA APEN

Matthew le Luke in Jesu hi Bethlehem'a peng ahi ati lhonnin, hichu Augustus'in min sun dinga thu apeh lai ahi. Joseph le Mariam hi Nazareth'a chenglhon ahin, insung dungjui cheh'a ahung kondoh nao khopi'a minsut ding angai jeh chun apu apa khanga pat ahung chenna'u Bethlehem'a minsun dingin akondoh lhonin ahi.

Matthew le Luke in Jesu pen chung changa hin thil thupi tah ni asun lhonin, hichu Lhagao Thenga kona Mariam sunga akijila chule nungah thenga kona ahung pen ding chu ahi. Naosen chu ahung pen teng amin Jesu kisah ding, aman amite chu chonsetna kon ahuhdoh ding ahi ati (Mtt.1:21). Jesu hi Hebrew paova *Yeshua/Jeshua/Joshua* ahin (Latin/Greek'a *Iesus* akitin, English'a Jesus ahi) hichu "Pakai chu huhhingna/huhhingpu/Sochatna (*the Lord is salvation*) ahi" tina ahi. Jesu/Yeshua hi chulaija dinga min kiha manchahloi ahi jeh'a midang toh hetkhen ahina dinga "Nazareth Jesu" ti'a kiseiji ahi.

Luke'in Mariam lampang thu, nungah theng ahidan aseijin chuleh vantil in Jesu pen ding ahung hetsah jong hi amang ahipon akhah pet ahi ati. Luke in Joseph lang thu aha seipon, ahin Matthew'in vang Joseph lang pang ahaseijin, Jesu hung pen ding thu hi Josep manga kihetsah ahi.

Kumjabih khat'a pat nin Jesu nungah thenga apen thuhi thil dang sangin kinelna anahi. Hetgil na nei phabep'in nungah thenga apen hi tahsan hih jongle Christian tampi 'in apomui. Mitampi in apon louna jeh chu:

1. Mark gospel, gospel kijih masapen le Paul lekhatotho, gospel sanga kijih masa ho'a ajaopoi ti ahi. Ahin amanin ajih louna chu ahet lhon lou jeh hilouvin, Mark'in chidang namdang te dinga ajih ahi jalla Jesu anatoh, athi le atho thu hi akhohsah joh ahi. Alangkhatna Paul hi gospel jih hilouvin lekhatot ahi jeh ahi. Ahin amanin jong Joseph chung chang seideh louvin Mariam thujoh asej lhonin (Mark. 6:3 – Mariam chapa, Gal. 4:4 Numeija peng), hichun Lhagao Thenga kijila Mariam'a kon hung peng ahi avetsah'e.

2. Hiche hi leiset umdol chenna lhongpi (nature) to akitohpon, hithei ponte atiu ahi. Ahin Jesu hinkho le anatoh ho, thilha anodoh, mithi athodoh, adamlou adamsah ho'in Pathen ahina aphon doh banguva apen jong hi leiset ngaidol chenna lhongpi kala Pathen natoh (super natural) ahi.

3. Jesu pen thusim hi Greek te tahsan Pathen leiset mite tahsa limma ahung toh akibange atiu ahi. Ahin NT thu hohi OT a pansa ngen ahin, Jesu pen thudol jong hi Pathen thutep guilhuna ahi. Chuleh Jesu pen hi Greek te pathen ho pen tobang ahipoi. Ajeh chu amaho pathen hochu mihem to kitimatna hungpeng ji'u ahin, Jesu vang Pathen le mihem kitimat na'a kon hungpeng ahipoi.

4. Amahon Jesu pen thusim hi Pathen thu (theology) ahin, thusim (historical) tah tah ahitheipoi atiuve. Ahin Luke in kicheh tah'in 1:1ff na'ah Pathen thu goh hilouvin thusim ahi dan jong ahilchenne.

5. Nungah thenga apen hi atah hilou thulhunlui – Is. 7:14 'a kisei guilhun na ding mai mai ja kitem thu ahi atiuve. Hiche'a het ding khat chu NT in OT hi itobanga aman chah ham het ngai ahi. OT gah kilason ji hohi NT'a kiseiho atah ahi mong mong phot chetna dinga kisei ji ahi.

6. Hebrew'a nungah theng (virgin) hi *betulah* kiti ahin, Isaiah 7:14'a thucheng kimang hi *almaah* joh ahin, hichu english'a maiden (nungah) kiti ahi. *almaah* hi nungah theng khelkhel seinu hilouvin, nungah jile cha neitheiho kiseina jong akimang ahi (cf. Prov. 30:19) atiuve. Ahin Matthew hin Hebrew text hilouva Greek Septuagint (LXX) joh alahson ahin, Greek'a chun *parthenos* akitin, hichu nungahtheng/virgin seinu ahi. Matthew hin Mariam chu Pathen haikhumna chang puma nungahtheng ahi ti'a ajih goh hilouvin, Luke 1:34 ivetle Mariam'in Vantil jah'a chun "Pasal la kahe khapon/I know not a man (KJV)" atin, hichun pasal to kakitimat khapoi atina ahi. (eiho Bible jonghin ilekhel kitnun ahi). Mariam chun Pakai Vantil koma ajou asej louding, ajou asej jongleh amatdoh ding ahin; Pathen'in jong Mariam chu nungahtheng ahijeh'a alhen ahi.

Achunga kiseiho hi nungah thenga Jesu apan tahsan lel na ding aumpoi. Mitam tah'in kidang tah'a Jesu pen chu atahsan louvu thu ahin, Pathen Jesu'a mihema ahung pen hi thil kidang tah ahi banga nungah thenga Jesu pen hi thil kidang ahi. Jesu nungah thenga apen hi leiset chungu thil hetthem tam tah'in khot doh jouhoi sa hih'u hen, vannoi chenna lhongpi toh kikal in geljongleu atahsan ho dingin vang bailam tah ahin, mihem chihna, boltheina khel lampeh ahi jeh'a chu thil kidang Pathen natoh hija ahi.

BUNG – 5

JESU CHRISTA MINHO

<u>Amin</u>	<u>Avetsahna</u>	<u>Bible chang</u>
Adam, Adam nukhah	Huhhing channa ding lama mimasapen	1 Cor. 15:45
Alpha le Omega	Thil jouse kipatn le chaina	Rev. 21:6
Hinna changlhah	Nehthei, an poimopen	Jn. 6:35
Ininga songpi thupipen	HInkho kibulphuna dettah	Eph.2:20
Kelngoi ching lamkai	Mihuhdoh, mikithopi, mipuihoi	1 Pet.5:4
Athilah'a peng masapen	Thokit nale hinna lampi lama eipuihao	Col.1:18
Kelngoi chingpha	Eivah'u, eipe pao, eichinghoi uva	Jn. 10:11

Thempu chungnung	Ichonset jeh'uva gankilhaina chamkim	Heb. 3:1
Pathen na kon atheng	Ahinna'a chonset neilou	Mk. 1:24
Immanuel	I hinkho'uva imalam jouse'a eipuihao	Mtt. 1:23
Vannoi vah	Muthim lah'a kinepna eipepau	Jn. 9:5
Loupi na Pathen	Pathen hing thanei nale eiumpi pao	1 Cor. 2:8
Pathe & mihem kah'a palai	Pathen masanga eipuilut pao	1 Tim. 2:5
Thuhilpa	Mihem te jah'a Pathen phondoh	Lk. 1:38
Themgao	Pathen thutah kitah tah'a phongdohpa	Acts. 3:22
Huhhingpu	Thina le chonset na'a kon eihuh doh'u	Lk. 1:47
Abram chilhah	Pathen kitepna na'a kon palai	Gal. 3:16
Thu	Pathen to thilsem lai ja umkhom	Jn. 1:1
Houhil/Rabi	Oja thupi pen leh aching pen vetsahna	

MIHEM CHAPA: . Hichehi Jesun adang jouse sanga ama kiseina aha manchah pen thucheng ahin; Gospel sunga 80 vei (Matthew'a 29 vei; Mark'a 14 vei; Luke'a 24 vei; John'a 13 vei) tobang akimangin, abona hi Jesun ama kiseina aman ahisoh keije. Hichehi Messiah'a kiminvona/Messianic title ahin (Dan. 7:13,14), Jesu Christa amihem hina, akineosahna leh bolgentheile kikheth'ah aum ding (Jn. 3:14; 8:28) seinah ahi. Chule Mihem Chapa hi ahunglung ding phatna athanei ding le loupina achan ding (Jn. 5:27; 9:39; cf. Dan. 7:13,14) seinah jong akimange. Jesun mihem chapa ti'a akisei lona jehchu kitepna phat alhin loulai jeh'a Messiah kiti thuchenghi aman lou, ahi'a Messiah ahi seijuiten ahet dohna diule chuphat lai ja Rome lenggam toh akikal louna dinga leiset mihem lamma ahei doh, chuleh mihem chamkim ahi aphotchetna'a amanchah ji ahi.

PATHEN CHAPA: Gospel ahin Messiah leh Pathen chapa hi kibang tenin akiseije. OT khanga mihemte adeh'a Adam (Gen. 5:1) chu Pathen chapa kitihen, Israel te chu Pathen chapate tin kikou jongleu, Jesu Christa hi Pathen chapa ahideh setnin, chapa changkhat ahi (Jn. 1:14). Gospel tampi'a kimu dungjujin Jesu leh Pathen kah'a kigui jopna hi mihemte lah'a Pa le cha kiguijopna sangin agiljin athuhjon ahi. Jesu Pathen chapa kitilona jeh chu: Pathen amatah kiponna ahijeh leh Pa chu Pathen ahi ti'a hegila chapa ama bou ahi jeh, chule amatah jong Pathen ahi vetsah na ahi.

BUNG – 6

JESU CHRISTA PEN PHATLAI JA MITHUPI HO

1. CAESAR AUGUSTUS: Augustus hi Octavius jong akiti. Cai'us Octavius hi Julius Caesar in agoulo dinga akivah ahin, achapa tahtah hilou, midangcha, atupa joh ahi. Julius Caesar thi masangin (44 BC) Rome government Republican government vaihop na noi ja let kichu na anadim aboi jingin ahi. Ahin Octavius hin 31 BC a amelma akitetpi nukhah pen Antony chu Actium mun'a gal'a ajo to lhonnin 29 BC kumin Rome kivai homna (senate) in Octavius hi Rome mite leng masapenin aphone doh'ui. Chuin Kum 2 jouvin ama janan a'title din Augustus ape'un, hichu akidomsang/ choisangpa (exalted one) tina ahin, houlam dolla jana vetsahna thucheng ahi. Rome Republican government chu suhbeijin aumin, Augustus chu Sepay thaneina'a vaihom lengin akipansah'in, kum 76 ahi'a athi geijin (AD 14) leng dinmun atuh jinge.

Augustus hi alenggam pumpi'ah chamna le kilung khatna aumsah'in, twikhanglena michomho (pirates) asubeijin, leichunga gucha michomho (robbers/bandits) asumangin, chele vale leh kiveina lam pang bit tah'in achelha thei kit'e. Rome lenggam sunga miten Augustus hi mihem huhhing,

tichu tahsa lam le boina jouse bouseh'a gellouvin, huhhing Pathen tobang lengin agelun, ama janan temple jong asahpeh'un ahi. Hiche Augustus khang laiija hi minsut ding ana kiphong ahi.

2. LENG HEROD (Herod the great): Herod hi bible a kimu Herod chilhah/insung leng holah'a amasapen ahi. Amahin 37-4 BC sung lengvai anapon, Idume mi (Esau chilhah) mi ahi. Amahi mikhoh tah le jonchih tah ahi. Herod hin nopsah, haosah tah'a hinding le inthupi tah tah ho angailun, tulai chan geija Israel gamma inthupi tahtah kisuse kimuho jonghi Herod khanglai peh'a ana kisa hidinga khot doh ahi. Insah ngailut ahito lhonin a'insah thupipen chu Jerusalem temple ahin (Mt. 24:1), kum sot tah lutna kibol ahin; athi geijin jotheng ahi naipon (Jn. 2;20) Jerusalem kisuhmang (AD.70) geija jotheng hilou lai ahi.

Herod hi itobang mi ahi Bethlehem a naosen jouse atha'a konna hetdoh thei ahi. Ama lungdeilou lamle adouna'a chon taphot chu nom'a thi ding tahsan hilou ahi. Ajite lah'a khat Mariamne jong hi ama thusah'a tha'a um ahin, achate ni Alexander le Aristobulus thina jong hin ama khut ajaove. Ajeh chu amaho chun lengdinmun hin chu khadinga aginmo jeh'a ana thasah ahi akiti. Chugoh hilouvin BC 4 athi masang ni 5 chan geijin jong a lenggama ama khella vaihom dingpa achapa Antipater tha dingin athu peh'e. Herod lengpa Herod the great kitilou nahi ama masanga lengho sanga agamsunga chamle lungmon aumsah joujeh leh ainsah loupi ho jeh ahi pene.

Herod hin athi masangin alenggam chu achate ahoppeh'in: Herod Archelaus chun Judea, Samaria le Idemea gamsunga vai apon; Herod Philip II chun Galilee sahlam le Jordan gallama vai apon (Lk. 3:1); chuleh Herod Antipas chun Galilee le Parea gamsunga vai ahomin ahi (Lk. 3:1). 2:1 le 2:21-22 hilchet vetben.

3. HEROD ARCHELAUS: Rometen Herod chu ana tahsanuva gam lentah chung a vaipo dinga ana tunuva, leng tite jong ana changa ahi. Hinlah Herod'in athinungle Rometen achapate khat penpen chu amabanga thanei tah'a vaipo'a akoilou ding chu ahen, hijeh chun athi masangin alenggam chu achate ahoppeh'in ahi. Egypt gama kona Joseph, Mariam le naosen ahung kile uva Judea gama vaipo'a anapanga chu hiche Herod hi ahi. Hinlah Archelaus chu leng giloutah le vaipoh themloutah ahijeh chun chomlou kah'in Rome'in apanmun alahpeh'in, akhelin gamvaipo (governor) akoitan ahi.

4. HEROD ANTIPAS: Herod lengpa chapa ahi. Amahi leng (king) tite chang talouvin 'tetrarch' – lenggam hopli'a hopkhat chung a vaipo – joh akiti tai. Antipas hin 4 BC – AD 39 sungin Galilee le Parea gamsunga vai apon ahi. John Baptist thatna le Jesu thu ana tana totna ananei chu amahi ahi.

5. PONTIUS PILATE: Pilate hi Rome lengpa Tiberius'in Judea (chule Samaria) gamsunga sunga gamvaipo (procurator/governor) a'nga chana dinga apansah ahin, AD 26-36 sung apoi.

BUNG – 7

KUMSOMTHUM SUNG KIGOTNA

Gospel'a themcha kimu tilouvin Jesu Christa hinkho masa langhi het ahipoi. Kum 12 ahi'in Jerusalem'a Kalchuh Kut mangdingin ache'in (Lk. 2:42), Nazareth kho adalhah'a natong dinga akondoh hin kum 30 ahitai (Lk. 3:23). Hiche kum 18 sung chun Jesu chu Juda dan dungjuija mijouse hetna, tohna lam ma ahung kijil toutou ve (Lk. 2;52). Hiti chun chihna le atahsa akhangtougouvin Pathen le mipi sah in aumtan ahi akiti.

1. INSUNG: Insunga hinkho hi Jesu anatoh kipat masanga ajil thupi pen ahi. Hiche sunga hi Jesun Insung hi ipi tina ham ti ajil ahi. Anu le apa hi lhagao mitah ahi ding tahsan ahin, chuleh apa

hi khangdong cha ahilaija thi ahitah ding jong tahsan ahi. Ajeh chu gospel lekhabu'a avelin akiminphah tapon, ahin anu le asopi ho akimin phah jinge (Mk. 6:13). Jesun sopi pasal li aneijin, Jacob, Joseph, Juda le Simon ahivu. Hiche ho lah'a hi Jacob le Juda hi Christian houbung masa langa minthang tah le phachom tah ahi lhonnin, lekhatot khat khat jong asun lhonin ahi. Chuleh adeh'in Jacob hi Jerusalem'a Bishop; Houlamkai ahin (Acts. 12:7; 15:13; 21:18; Gal. 2:12), asopi numeiho vang aminu akisunpoi.

2. THEMJILNA: Jesu jilkung (teacher) ho chu Pathen, Bible, thilsem (nature), anu leh apa chuleh Synagogue'a ojaho chule Jerusalem agavilna'a danthu sunho chu ahivu.

Judate themjil dan chu: Juda chapang chu ahung paothei thei uleh "Shema" (Judate tahsan) OT'a konna kila doh (Num. 15:37-41; Deut. 6:4-9; 11:13-21) chu ahil themun, lungchinin ase thei sah masat penun ahi. Ahung khanlet jep uva ahiteng lekha jihdan ahil'un, kum 6 ahung hitenguleh school akai sah'ui. Hiche laija schoolho chu synagogue noija um den ahin, Jesu jong chapang cha ahilaija akho'u Nazareth'a school anakai ahi. Chucho ti louvin jong lekhasim sangna ding Jerusalem'ah aumin, hiche theology le dan kijilna college/university ahin Jesu chu agakai poi (Jn. 7:15).

Jesun lekha asim thei je tichu Nazareth kho'a themgao lekhabu asim'a konnin hetthei ahin (Lk. 4:16), chuleh jih jong ajih theije tichu ajonpetna kiman numeinu ahin puijuva tol asutna kon hetthei ahi (Jn. 8:8). School la themjilna goh hilouvin Juda chapang jouse chu apan a'ina danthu ahilna bana them (skill) jong ajil sah tei teiji ahi. Hichu ahung khanlet teng kihinsona natoh'a aneijiu ahi. Judate themjil danhi houlam le gamsung ngailutna toh kimat ahi. Mihem khat lungsunga danthu hi umсах teitei ding ti ahi. Talmud seidanin, "Mipa khatin achapa chep atan dingle danthu ahil ding chuleh them ahilding ahin; mipa khat chun achapa chu them (skill) ahil louleh guhchat ahil ahi" kiti jeng ahi. Jesu thing thembol jonghi apa Joseph'in ana hil hiding ahin, Joseph thi nunga Jesun hichu amanchah'a insung mipa le upa hina asuh bulhit ahi.

3. PAO: Jesun pao thum ahe'e:

- i. Hebrew:** Lk. 4:16'a kisei dan in Jesun Hebrew lekhajol'a kisun Isaiah themgao lekhabu asim'e. Hebrew hi Bible pao, hou natoh na'a kimang le lekhabu kisutna ahi.
- ii. Greek:** Jesun Greek jong ana het tei ding tahsan ahi. Ajeh chu chucho phatlaija chu Greek hi vannoi losoh pao ahin, chuleh Galilee gama chu Greek pao tho gentile te tamtah uma ahi. NT jonghi abona Greek paova ana kisun ahi.
- iii. Aramaic:** Aramaic paohi NT phatlaija Palestine gama milhamhon ana manchah'u pao ahin, Jesun jong anitin hinkho'a amanchah jing pao ahi. Tekah nan *Abba, Tabitha kumi, lama sabachthani*... tiho hi Aramic pao ahi.

BUNG – 8

JESUN KUM 12 AHI'A KALCHUH KUT AGAMAN

Juda te dinga kut thupi pen chu Kalchuh Kut ahi. Hiche nikho hi leh Judaten Pathen'in itobanga Egypt gamma asohchan naova kona ahin puidoh'u ham agel doh jingu ahi. Kalchuh Kut masang hapta 6 sungi synagogue mun le kihil namun jouse chu kalchuh kut thudol kihilna hin alosoh ji ahi. Hitiachu Chapang Jesu jong chu Kum 12 ahito lhonin Jerusalem'a Kalchuh Kut manga ache na ding nikho chu ahung lung tai (Lk. 2:41ff).

Judate lah'a kiloikhomna thupi pen le sangpen, michingpen ho kiloikhom nale athu'u tan ji'a chu Houvaipoloi (sanhadrine) hi ahi. Amahohi Judate thutan (Jewish court) ahivun, thempu chungnung lamkaina mi 70 hiuva ahi. Amahon gucha, michom, tolthat goh hilouva, ijemtia khatnin khattou ajumso'a ahileh achungthu'u chu amaho hin atanjiu ahi. Sanhadrine hohi atuma amaho chang

toukhom jiuva danthuho hi aseï toh jiu ahin, hinlah kalchuh kut lai hileh japi lah'a kimuto uva akihoulimnao hi angainom nomin angai theiji hija ahi. Jesun hiche nikho chu amunoma ana kinep pi ahi. Hiche nikho chun Jesun Pathen chapa changkhat ahi athah'in atah langin, anatoh ding thupi pen chu mihemte Pathen lamma ahin puihut ding ahi aphonhdoh'in/aphochenin ahi. Jesun Judate danthu hi asuh mang got hilouva asuh bukim got joh ahin, agunna mangsa chu ahuhdoh got ahi. Hiche'a kon imu doh theiju chu Jesun ahung lona hi hoïtah'in chapang cha ahi'in ahe chene.

BUNG – 9

JOHN BAPTIST

John Baptist hi Jesu sanga lhagupma upa jo ahi (Lk. 1:26). John hi Hebrew min 'Johanan' (2 Kgs. 25:23; Jer. 40:8) to kibang, 'Pakai hi lungset them ahi (the Lord is gracious) or Jehovah'in alungsetna amusah'e (Jehovah has shown grace)' tina ahin. John hi Thulhun thah phatlaija dinga min kihaman khat ahi. John minhi Gabriel vantil'in apa Zacharia houin sunga lhachana atoh'a akimuto pi'a asah ahi (Lk. 1:13). Anu Mariam jonghi Aaron chilhah ahin (Lk. 1:5), Jesu nu Mariam sopi ahi (Lk. 1:36)¹. Jesun numei sung pengho lah'a alenpen ahi atin (Mt. 11:11); chule Malachi'in (Mal. 4:5) Elijah hung dinga aseïchu John hi ahi ati (Mt. 11:14; 17:10-12). John '**Baptist**' kitilona hi John dangtoh akihetkhen nading goh hilouva a chonset kisihna neïjouse baptize achansah jeh ahi. John Baptist natoh kipat hi Luke 3:1'in Tiberius Ceasar lengchan kal kum 15 lhinkum atin, hichu AD 28 August leh AD 29 August kïkah ahi.

John pon-ah chu pon hilouva sangongsang mul ahin, ahoina le anopna umlouhel ding ahi. Apon'ah le akonggah hi Elijah themgao kivona tobang ahin (2 Kgs. 1:8), miho lungthima ahung dinga kisei Elijah (Mal. 4:5) ageldoh sahlleh ding ahi. A'anneh chu **khaokho** ahin, Pathen'in nehdinga aphaï ganhing lah'a khat ahin (Lev. 11:21-22). Chuleh **gamkhoïju** hi gamthip/gammang lah'a kimu ahi (1 Sam. 14:25-26). John nehle chah'a akitim danhi Nazir dihtah (Num. 6:2-8) ahi avetsah'e.

John natohna munhi Twithi (Dead sea) lhumlama um koïma chenna lou gamthip/gam ong lah ahi. Essenes kitiho loïchu hiche gamkaija hi ana pansao ahi. Gospel John'in hiche munhi Bethabara (Bethany jong kiti) ahi atin (Jn. 1:28), Jerusalem'a kon nikhat lam hija ahi.

John thu lhangsap chu "Nalung heïjun, Van lenggam anaitai" ti ahi (Mt. 3:2). Lungheïhi lunggel gahkhel maimai, chonset kisih maimai ahipoi. John'in lungheï atihï chonsetna kon kiheimang/chonset nungsun, chonphatna lama ga doh atina ahi (Mt. 3:8). Hichehi Jesu thuhil masatpen le thupipen jong ahin (Mt. 4:17; Mk. 1:15); Solchahho thuhil thupi pen jong ahi (Acts 2:28). Pentahna hi lungheïja kïpan teiteï ahi.

Alangkhatna Matthew'in "Vangam/van lenggam" atihï gospel danghon "Pathen lenggam" atiuvin, ahoiïoh chu hileh adoi kibang ahin, amite chungã Pathen vaihomna seinã ahi. Hiche lenggam chu tu'a jong lhagaova atahsanho sungã/lah'a kïpan ahitan (Lk. 17:21), nikhatle tahsatah'a Christan leiset chungã cheng mijouse chungã lengvai ahom ding ahi (Rev. 20:4-6). John in Pathen lenggam anai thu aseïjin, thutan na ahung lhun pai ding thu aseïje (Lk. 3:2,7). OT themgao hon ahung lhung ding thu aseï bangun John in athu hil jong chu ahunglhung ding thu ahi.

John'in achansah Baptisma hi lungheï vetsahna ahi. Judahõ chun "Gentïleten alung akheluva Pathen mite ahiu angai banga keïho jonghin kalung keïjuva Pathen mite dihtah kahïu angaije" ti'a Juda houva dihtah'a umdingã kïpehlut thahna'a John khutna twi alutnu ahi. Chujongleh John chu Messiah hungna dingã lampi semtoh ahito lhona, Judate chun Messiah hungding kïnepna/kïgotna'a lungheïja Baptize achansah'u ahi.

¹ Mariam hi Juda phunga kon David chilhah ahi itiuvin (Lk. 3:23-28), Ahin Elizabeth hila Levi phunga kon Aaron chilha chilhah ahin (Lk. 1:5); Hichu ahile Mariam Elizabeth sopi (Lk. 1:386) akiti lona hi apa langkaija kon hilouva anu langkaija kon hiding ahi.

John'in Jesu thudol aseina'a "keima akengchot choi dinga jong kilom kahipoi (Mt. 3:11)", "Akengchot khao sutlham dinga kilom kahipoi (Lk. 3:16)" ati. Sohkhath dinga mikhat kengchot khao sutlhap/kengchot choipeh kiti hi natoh neopen ahitai. John'in keima akengchot khao sutlham dinga jong kilom kahipoi (Mk. 1:7) ati hin Jesu achoisangna le ama kineosahna avetsah ahi. Keima Messiah chu kahipoi (Jn. 1:20; 3:28) atigoh hilouvin, keima asoh lah'a aneopen dinga jong lhingjoulou kahi atina ahi.

Anatoh ding thudol aseija'a: Lhagao le meija baptize nachan dingu ahi ati. **Lhagao Thenga** baptize chanhi Pentecost nikho'a lhunga chu ahi (Acts 1:5; cf. 2:4). Pentecostal hon Lhagao Thenga baptize chan hi atumbek'in seijongleu, eiho tahsan vang mihem khat chun Jesu Christa atahsana apenthah thahle Lhagao Theng changa hichu lhagaova baptize chan kiti ahi (1 Cor. 12:13). **Meija** baptize chan atihin: Mei hi thutanna sein'a kimang ahin (Mt. 3:10,12), Jesun meija baptize achan ding kiti jonghi ahunglung ding nikho'a lunghei louho chung thu atanding aseina ahi.

BUNG – 10

JESU BAPTIZE CHAN (*Mt. 3:13-17; Mk. 1:9-11; Lk. 3:21-23*)

Jesu ibola Baptize achan khoh ngaiham? Ajehchu John Baptize chan chu lungheina ding ahin, Jesun chonset aneila ahapon, alung aheila angaipon, ibola baptize changa ham?

1. A baptize chan hin John natoh chu pha asah/aphatsah (approve) avetsah ahi.
2. Messiah ahi phondoh na ding leh mipi hon atahsan uva asan nadiu joh ahi (Jn. 1:31-33).
3. Anatoh patna dinga ngansena/kintheng tongdinga mopohna kipehdoh na ahi. Judate kiloi khomna'a thempuho chu thempu na atoh masanguleh Baptize (twija kisil) ana kibolji ahin (Ex. 29:4), hibanga chu Jesu jong thempu ahi jalla (Heb. 5:6) kotna chu alutna akisuh theng ngai ahi.
4. Anung hinjui dingho (Christiante) baptize achanna diuva tilkhouna. Aseijuiten avetton diuva abol ahi
5. Natoh apat ding tahtoh lhona Pathen chapa ahi photchetna ding (Mt. 3:16-17).
6. Jesun chonseho toh simtha'a aumlou leh achonsetnao apoh theilou ding, chonset jeh'a thitheilou ding ahin; achonsetnao apoh'a Achonphatna chonseho achan theina ding (2 Cor. 5:21), Chonseho toh thakhatna simtha ahi vetsahna'a (identification with sinner) John khutna baptize changa ahi. Ajehchu Ama mihemte jouse chonsetna popa ahin, mihem chonset jeh'a thi ahi.
7. Athi, akivui le athodoh kit ding vetsahna ahi.

Jesu baptize achan jouva, twilah-a kona ahung potdoh'a thilsoh (vankot akihongin, chule Pathen Lhagao vakhu banga ahung lenlah-a achunga ahungchuh; Ama hi ka-Chapa deitah ahi, achunga kalung alhaitangeije, tia vana kona aw hung ging chu (Mt. 3:16-17):

i. Pa Pathen leh Lhagao Theng Pathen'in Chapa Pathen Jesu aphotchetna (approved), athensona (inaugurated), thaneina kipeh (empowerment) chule asol/anganse (commission) na ahi.

ii. Pathen thum (trinity) photchetna ahi. 1) Chapa Pathen Jesu Christa chu baptize achangin, 2) Lhagao Theng Pathen chu vakhu bangin ahung lenlhan Jesu chungahung chun; Lhagao Theng chu Jesu Christa panpi ding leh thahatna pe dinga achunga hungchu'a, achunga pansa dena, Lhagao Theng thaneina'a na toh'a thil kidang abola (Matt. 12:28; Acts 10:38), athinung jenga jong Lhagao Theng kaithouva um ahi (Rom. 1:4; 8:11). Chule 3) Pa Pathen'in van'a kon 'Ama hi ka-Chapa deitah ahi, achunga kalung alhai tangeije' ahintin ahi. Pa Pathen kamsoh hi Thulhun lui mun ni'a kon ahin, ani'a hi Messiah kiseina ahi cheh'e. 'Ka chapa deitah ahi' tihi Ps. 2:1 akon kilason ahin, 'Achunga kalung alhai tangeije' tihi Isai. 42:1 'akon kila, Pakai Lhacha gentheipa (cf. Isai. 53) seinah ahi.

BUNG – 11
JESU LHEP PATEP'A AUM
(Mk. 1:12ff; Mtt. 4:1-11; Lk. 2:1-13)

Jesu chungu lhung lhepna thumho hi 1 John. 2:16 na'a kisei lhepna thum: tahsa ngaichat, mitvet deichat, kiletsah hinkho (pride of life²), ahi. Hiche hi Eden hona Eve chungu analhung ahi (Gen. 3:6). Hicheho mama: tahsa ngaichat (Mt. 4:2,3); mitvet deichat (Mt. 4:8,9); chule kiletsah hinkho (Mt.4:5,6) mangcha'a satan'in Jesu chu alhep ahi. Christiante chungu lhungji lhepna nasacheh jongchu ahi. Lhepna'a ichuh teng eiho hatna vang hilouva, Jesu banga Pathen toh pangkhoma Pathen thu'a ijo diu ahi (Mt. 4:4,7,10).

Jesu hi eiho banga chonsesa peng hilou (Ps. 51:5) ahijeh'in asunga chonsetnin mun aneipoi. Hijeh'a hi satan'in Jesu chu asunga kona ngaichatna aphep'a alhep hilouva polama tahsatah'a kimaitopi'a alhep ahi. Mark in kicheh tah'in asun pon, Matthew le Luke'a lhep patepma aum na'a satan thudoh lhanglhon le Jesun adonbutna lhanglhon (Order) akibang poi. Ahin lhanglhon chu hiche ahi.

1. Lhep patena amasa pen chu: **Songchang ho changlhah sosah ding chu ahi** (Mtt.4:3f). Mihem khat ni 40 le jan 40 an ngola aum nunga adeh'a Avela songgel (limestone) chanlhah toh kibang chet dimset jeng lah'a aum laiija chu amihem hina'in angaichat pen chu changlhah, oiva theina chu ahi. Hilaiija lhepnahi Khatna'a Jesun athanei na thangthip tah'a (midang dinga manglouva ama'a dinga amang ding'a) aman dinga lhepna ahi. Nina'a Jesun mihemte chu thil le lo/neh le chah aphep'a anung kijuisah ding (bribe) ti'a lhep patepna ahi. Thumna'a thil umdan khel ding (change situation) hi ahi. Ahin jesun lhep patepna chu danthu/Pathen thu'in adonbut'in chanlhah keovin mi ava theipoi, Pathen kamma hungpot doh thucheng ho'a bou va ding ahi ati (Deut. 8:3). Satan'in Jesu Pathen chapa nahileh ti'a aseina lo hi Pathen chapa ahina chu atahsan lou jeh hilouvin, Pathen lunggel pa chu Jesu apalkeh sah got'a a-Pathen hina'a athaneina akoi lhahsa chu (Phil. 2:7) athah manchah sah got ahi.

Satanin Jesu chouna'a amanchah thucheng thupi pen chu: "Pathen chapa nahileh" tihi ahi. Hiche hi Jesu Cross'a aum lai ja kichouna jong ahi (Mtt. 27:40; Lk. 23:35-37). Satan in Jesu chu Pathen chapa ahi chu atahsan lou ahapon, Pathen chapa ahi na chu atah lah'a satan thusei anit ding chu avetsah nom, chuleh Pathen chapa ahina chu kiletsah le kiboltheisah na'a amanchah sah got ahi.

2. Lhepna nina chu **Jerusalem hou'in ting vuma kona achop lhah'a kisu kha louva tol achuh ding chu ahi** (Lk. 4:9-12; Mtt. 4:5,7; cf. Ps. 91:11,12). Hiche munhi Jerusalem houin lhang solama (SE) um houin tingyum munkhat, Kidron phaichama kona abang hung kihatou chu hidinga tahsan ahi. Josephus'in hiche munhi feet 450'a sang ahi ati. Satan in Jesu chu Messianic lamkai khat bang gah hi'a Rome gamvaipoh na'a kon kiphin na mipi te galloi khom ding tihi atup sah ahin, chule Jesu inchung chuchan sanga kon ahung kichop lhah'a kisukhalouva a'um thei teng min ahin tahsan ding tina ahi. Ahin hijong chu Jesun Bible thu mama'in adonbutin "Nangman na Pakai na Pathen chu lhem patep hih'in" ati (Deut. 6:16).

3. Lhep patepna thumna chu **Satan'in Jesu molsang tah chungu adin sah'a amachu ahouva ahile vannoi leiset gam jouse aphep ding ahi**. Vannoi leiset pumpi mutheina ding molsang aumlou jehle vannoi leiset apumpi khatvei mua akimu theilou jehhin mi tampin satan'in vannoi leiset gamle aloupija jouse hi Jesu lungmitna/gaova amusah (visionary representation) hidin atahsanui. Hichu satan dinga hahsa hilou ahi. Hilaiija lhepna hi satan houding hi ahin, chuti leh vannoi leiset pumpi le

² **Pride of life** kiti hi Kuki bible'a "hinlai kivahchoi" ti'a akile jeh chun thusei tampin "Love song" aseina ahi atiuvin, love song sah chonset ahi tin hilchetnan amangun ahi. Hinlah 'love song/lunglenla' seinu hilouvin, ithinkho'a hi Pathen hilouva eima letding, loupi ding, choisanga umding ngaito aseina ahijoi.

asunga um jouse apeh ding hi ahi (Mt.4:8-11). Hilaija lheppatep na hi satan to kinopto ding (compromise) tina ahi. Satan hi min ahounding thanom tah le Pathen hiding thanom tah ahin (Isai. 14:12-14), hitolhona Jesu akhupboh'a alhuh'a ahouva ahile genthei hesoh thoh louva achom lama lengvai pohsah ding ati ahi. Ajehchu satan hi vannoi vaihomba (Jn. 11:31), vannoi pathen (2 Cor. 4:4) ahin, vanoiji ama thunoija uma ahi (1 Jn. 5:19). Hinlah Jesun achomlam (shortcut) lhenglouvin Pathen'in achoisang ding (Phil. 2:9) alhengjon ahi. Pathen lungdei molsona dinga hin shortcut aumpoi. Aloupina ikikoppi nomule agentheina jong ithohpi dingu ahi (1 Pet. 5:10). Jesun dan thu maman satan chu ajou kitne (Deut. 6:13).

Diabol milhep danhi chonset dana kilang louhel tah'a khu alhep ahi. Jesun song changlhah agah so sah ding chu hahsalou le dihmo loutah ahi. Chuleh Pathen mi hoidan agah phot chentna dinga inchunga konna agah chop lhah jeng jong hahsa lou le dihmolou tah tobang ahi. Chuleh thilneocha gahbol jeh'a leiset chung pumpi gah jo ding ahithele le asetna aumpoi tithei ahi. Ahin chonset to jong kibang lou neocha chun lentah'a sukhel ahin lhut ding ahi. Chonset neocha bolhi setna abah louvanga setna kot kihon na chabi ahi.

Jesu lhez patep'a aum thusimhi achangeh'a aumpet gamthipa'a thilsoh ahin koiman aheth lou ahin iti danna gospel jih hon ajih u ahidem? Jesu amatah'in aseijuite henga aseidoh hiding ahi. Hiche hi Jesun aseijuite gihnale, lhamona chuleh hatsahna dinga ase iahi.

BUNG – 12

JESUN SEIJUI SOMLE NI AKILHEN

Jesun achaina leh athi ding ahen, chujeh chun anatoh ache jom jing nadingin ama akinaipi deh anungjui ding mi alhen angaije. Jesu dinga chu amaho chu lekha hing athusei ajih dohna hidingu ahi (living instrument for his purpose be carried out). Jesun amilhen dan chu miching ho, ahethemho, lekhatem sang leh themjil sang nalam hilouvin, ahin danu le anatoh danuva kon joh ahi (busy person). Aman ahinkho kimansa/kigochaisa hochu anatong dinga akou ahi. Amasan amaho chu amato umkhom dingin akouvin, abannin apalai din asole.

Seijui kiti hi Greek paova *mathates* ahin, mikhat nin jilna apeh 'jillai (student)' tina ahi. Christiante jouse hi jillai ihisoh keijun, Seijui ihiuve. Solchah atihin natoh khat tongdinga thepna bulhing setna thalhenga kisol (qualified representative sent on mission) aseina ahi. NT'a solchah ti'a kikouho chu Jesu amatah'in akou, Jesu toh kivopjinga a'anga kichuhna nei, Jesu amatah'in kipana thupha lhangsam dinga asolho chu ahiuve. 12 hochu Jesu toh akivop laijuva seijui (student) hui ahin, Jesu henga jilding jouse ajil jou'uva Jesu thalenga akalsonuva chu Solchah kitiu ahi. Amaho chu (Mtt. 10:1-4):

1) **Peter kiti Simon:** Simon hi amintah ahin Peter (Greek - Peter, Aramaic - Cephas, Thadou - song) hi Jesun asahpeh ahi. 12 ho min kisutna jouse'a amasapenin apangji hin 12 ho lah'a alamkai (spokesperson) ahi avetsah'e. Jesu thodoh nungin houbung phudoh ahina din lamkaijin anapangin ahi (Acts 2-12). Peter hi Jesu seijuho lah'a dinga asunggil dehset (inner circle of disciples/closest friend of Jesus) kiti thumho lah'a khat (ni chu Zabedai chapa teni: Jacob le John) ahi.

2) **Andrew:** Amahi Peter naopa ahi. Peter Jesu henga hinpuilutna chu hiche Andrew hi ahi (Jn. 1:41-42).

3) **Jacob:** Zebedai chapa lenjopa ahi. Solchahho lah'a dinga Martyr chang masapen ahi (Acts 12:1,2). Jesu nung ajui masanga apa le anaopa to ngaman mi hiuva ahi.

4) **John:** Zebedai chapa Jacob naopa ahi. Jesu thodoh nungin Jerusalem houbung khompi'in ana pangin ahi (Gal. 2:9). Chujouvin Ephesus'a achen, chumuna kon chu Gospel John ajih'in; Ephesus'a

kon Patmos twikol'a solmang (exiled) ahin, chumuna kona chu Pathen'in amusah dungjuija Thuphon lekhabu hi asut ahi.

5) **Philip**: Bethsaida khomi ahin, Nathanael Jesu henga hinpulitpa, (Jn. 1:44-45); Jesun mi 5000 avahna dinga sum ana khotpa (Jn. 6:7); Jesu henga Pa chu neimu sah'un tipa (Jn. 14:8-9) chu ahi

6) **Bartholomew**: Bartholomew hi Philip'in Jesu henga apuipa Nathanael chu hidin tahsan ahin (Jn. 1:44), Galilee gama Cana khomi hiding ahi (Jn. 21:2).

7) **Thomas**: Amahin Jesu thodoh atahsan lou jehchun tahsanlel Thomas (doubting Thomas) tin akiseijin ahi. Thomas hi Didymus jong akitin, hichu pengkop/ni (twin) atina ahi. Judea gama Jesu toh thithadin cheote ti'a seingam (Jn. 11:16) mihangsantah ahin; Jesu athodoh nungin India gama missionary'n ahunge.

8) **Matthew**: Amintah chu Levi ahin, Matthew hi Jesun asahpeh hidia tahsan ahi. Masanga chu Rome sorkar noija kaidong anahin, akaidonna munna atoupetna anung juindinga anakouva, aman jong apet petna ana juipat jeng ahi.

9) **Jacob**: Zebedai chapa Jacob toh hetkhen ahina din amin akiphah nachana Alphaeus chapa Jacob tin akisunjin ahi. Amahi Jacob neojo tinjong akiseijin, anu min Mariam ahin, asopipa min Joses ahi (Mk. 15:40).

10) **Lebbaeus**: Thaddaeus tin jong akihei. Mundanga amahi Jacob chapa Judas tin akisunjin ahi (Lk. 6:16; Acts 1:13).

11) **Simon**: Canaan khomi ahigoh hilouvin, Canaan mi (Cananaean) kiti thuchenghi chuphat laiija Palestine gama vaihom Roman lenggam suhlhuh nadinga ana kiphutdoh galguhbol Zealot ho seina kimang ahi. Simon hin Jesu anajui masanga galguhbol Zealot ho lah'a anapanga ahi (Acts. 1:13).

12) **Judas Iscariot**: Judas bouhi Galilee gammi hilou ahin, Kerioth khomi ahijeh'a Kerioth khomi Judas (Judas Iscariot) kiti ji ahi. 12 ho lah'a sumdip vopma (sumching) panga ahi (Jn. 12:6). Tahsa phatchomna dinga Jesu nung anajui ahin, tahsa'a chan ding amulou phatna akhon na'a Jesu dangka 30'a akijohdoh'a amatsah ahi.

BUNG 13

JESU PATHEN MIHEM (GOD-MAN) AHINA

Gospel'in Jesu chu mini danin aseini ngaipouvin, amachu khat ahi jenge. Ahin Jesu hina (nature/attribute) hi ivet leh ni aneije. Mtt. 16:13 na'ah "Mihon mihem chapa ahi atiuvi" mihem chapa tihin mihem ahina avetsah'in ahi. Ahin Peter'in Jesu jah'a Jesun koi kahim ti'a adoh chun "Nangma Christa Pathen hing chapa nahi" atin, Pathen ahina avetsah ahi (Mtt. 16:16). Hijeh hin jesun hina ni aneijin; hichu mihem le Pathen hina dihtah ahi. Hiche to kisaija thuhil (doctrine) thupitah chu hina ni atum cheh'a mihem khatna aumhi ahi. Jesu chu mihem ahivanga Pathen ahina lhasam chom lou, Pathen ahivanga mihem ahina lhasam chomlou ahi. Hiche ahina ni chu chengkhom/umkhom lhonna mihem dihtah khat asolhon ahi. Jesu chu Pathen ahapon, mihem jong ahapon: Pathen-Mihem ahi. Gospel dungjuija Jesu chu Mihem chapa le Pathen chapa hija ahi.

1. Pathen ahina

- a. Thumop them kidangtah, tonsot Pathen, chamna leng Chapa (Is.9:6)
- b. Pathen mi umpina (Mtt. 1:23)
- c. Pathen Chapa (Jn. 10:36)
- d. Pakai le Pathen (20:28)
- e. Amasa le anukhah, abul le aleh (Rev. 22:13).
- f. Pathen loupina le aumje kibahpi (Heb. 1:3)
- g. Tonsotna um (Jn. 1:1; Heb. 1:11; 13:8)
- h. Mun jouse'a um (Mtt. 18:20)

i. Ijakai hesoh (Col. 2:3)

2. Mihem ahina:

1. Mihem min – Jesu (Mtt. 1:25; 1:1)
2. Mihem hina'a tahsa le thisan anei (Mtt. 26:38; 26:26; Lk. 24:39).
3. Mihem chena lhonpi banga khantou (Gal. 4:4; Lk. 2:40, 52).
4. Mihemin anei lungthim le ngaichatna anei (Mtt.4:2; Jn.4:6; Jn.11:35; Jn.12:27; Heb 5:7-8; Lk.22:44).

BUNG – 14

PATHEN LENGGAM (JESU THUHIL THUPI PEN)

Judaten Pathen hi leng'a aheth'u ahin, hijeh'a chu lengkhat chun avaihomna lenggam anei teiding ahi. Leng'a kivaipoh hi Israel ten Canaan le Egypt mite'a konna alah sonnu ahi.

Greek'a lenggam hi *Basileia* akitin, Hebrew'a *Malkut* akiti. Gospel in hiche hi jatni'in amangin, Pathen lenggam le Vangam/van lenggam (kingdom of God & Kingdom of heaven) ahin, ani'ahi thakhat ahi. Matthew in van lenggam hi aha mannin 30 vei val aseijin, Pathen lenggam hi 3 vei bou amangchan ahi. Luke in vang van lenggam kiti hi manglouvin Pathen lenggam bou amangin, chubang chun Mark in jong Pathen lenggam bouhi amangcha'e. Mark'in 16 vei chule Luke'in 32 vei amang lhonin ahi. Judaten Pathen minhi man dinga thengval asah jeh'uva phah jong aphah poh ngamlouvu ahin (Exo. 20:7), ahithe channa akhel aum theile aman joh jiu ahi. Hijeh'a hi Matthew hin Gospel hi Judate dinga ajih ahi jeh'a Pathen lenggam sanga Van lenggam (Kingdom of Heaven) hi amanchah ahi.

Pathen lenggam hi OT'a konna ana kisei ahin, Jesu Christa khanglaija chu Judaten ana kiha neppi dehset laitah'u hija ahi. Amaho tahsan danna chu Messiah ahunga leisetna agal miteu jouse ahung jo'a lenggam ahung tundoh ding, Messiah chu leng hi'a avaihopna noiija chamle lungmong'a akhosah diu chu akineppiu le atahsan nu ahi.

John Baptist in Pathen lenggam asehi hin Christa akoh'in, lunghana peldoh nading le huhhing na kisan dinga Baptist anachan sah ahi. Aman thingphung tinna heicha akiphut soh tai, Pathen lenggam kisan louchan chu phuhlguh ding salhem ahitai ati. Ahin hiche lunghan na chu peldoh'a huhhingna joh channa dingin ana hillhangle'e.

Jesu Christa ahunga chu Pathen lenggam chu hunglung ahitai ati. Jesu thuhila Pathen lenggam atihin doi ni aneije. Pathen lenggam chu hunglung ahitai atihin, Christa natoh le thuhil ho chuleh huhhingna achansah ho dinga chu Pathen lenggam chu lhunga ahitai. Hiche hin atahsan ho jouse lungsung le lhagao hinkho'a Pathen lenggam alhun aseina le avetsahna ahi. Ajeh chu amaho chu tu noileiset jenga jong Christa vaihopna noiija umu ahitai. Israel te chun tahsa tah'a huhhingna dinga Pathen lenggam chu ana kinep piu ahin, Christa vang tahsa hinailou lhagaolama lenggam tungdoh dinga hung ahin, atahsan kiloikhom ho lah'a chu Pathen lenggam chu lhung ahitai (Lk. 17:21).

Pathen lenggam hi Jesu khanglai le tu'a tahsan ho lah'a lhunga ahin, Israel ten akinep pi banguva khonung leh Christa atahsa tah'a avella hungkit na ahungtun doh ding; hiche ni chu tahsan louho dinga thutan na leh lunghan channa nikho hiding, tonsot geija gotna channa nikho hiding ahi. Hiche niteng chuleh Christa atahsa tah'a amite'a dinga gal asat peh'a gal ajo'a leiset chungga alenggam atundoh ding, amaho chu amite huiua ama a-Pathenu leh Leng hiding ahi. Hijeh chun ahunglung dinga sei dingin Pathen lenggam hin Second coming joule kumsang lenggam chuleh tonsot lenggam Pathen lengvai hopna akoh'in ahi (Rev. 20:4-6). Ahin lhagao lamma seidingin Pathen lenggam chu

Christa ahunga mihem te dinga huhhingna achan na chu huhhing changho sunga alenggam chu atundoh ahitan, tahsan chate kiloikhom na chu Pathen lengvai pohna hija ahi.

BUNG – 15

JESU THULEM SEIHO

Thulem hi Judaten athuhil naova aha manchahpen tah'u ahi. Thulem kitih Greek pao *parabole* kiti'a kona kiladoh – sappao va “cast alongside” or “something thrown aside or beside” akitin, eipaova moltah'a ledoh din – vetkhom/vetchep/seichep ahiloule thilkhat apang/akoma koi – ithuhil chu min ahetchet theina dinga thildang khat (thusim ahiloule tekahna) akoma koi tina ahi. Thulem hi leiset thusim ahi'a vangam thuguh/thupi kiseina ahi. Thulem hin thilkhat in adoi chu kichen tah le lentah in ahetchen sah theije. Hiche hi thu kisei ahi'a lah thutekahna'a kimang; ithusei doh chu thilkhat mangcha'a kihetsah na ahi. Thulem hi insung pumpi vah hin lutsah mutthong (window) to tekah ahi. Hiche hi Judea gamma dinga kihil na'a kimang chapen pen khat ahi.

Thulem hi thuchom cha tekahna thusim tobanga kisei ahi. Thulem hin hilchet angaicha ji'e (Mtt. 13:11,12). Jesun Galilee'a aumsungin thulem louvin thu aseipoi (Mt. 13:34). Jesun atahsan louho jah'a thutah hilouva thulem'a thu aseiji jeh chu thutan na leh lungsetna jeh ahi. Thutan na ahijeh chu amaho muthim lah'a um nom na uva chu aumsah jingin (Jn. 3:19); lungset man ahijeh chu; amahon khovah chu apaijalluva thutah chu aheth bebe uleh athemmo nao tambenh set ding ahi jeh ahi (Mtt. 13:13).

Kum jabih khat laijin thulem hi kihou matna'in ana mang ji'ui. Thulem in adoi chu akicheh jin chuleh khat vei veile athusim chaina langa thulem kisei lona akiseijin ahi (Mtt. 25:13). Thulem hi kihil na'a akiman hin patchomna tamtah aneijin ahi. Ajeh chu thulem hi thusim danna kisei ahi jeh'in bailam tah'in akiching baijin, chuleh thulem chu sao jong asaopon, het jong aheth hahsa poi.

Thulem hi NT a bou hilouvin OT a jong ana kimang pantai. Tekah nan David achonset na Urriah inneipi aluppi chun Nathan themgaopan David chu thulem mangchan ana phoh'e. Thulem hi achangseh'in akicheh theipon achangin thupi (message) ahithe poi. Ahin ithuseina'a ahahsalai chu ahetsah'a ahilchet johji ahi. Thulem hi Jesun ana man chah thupi pen khat ahi. Aman leiset chung akimvela um thilho'a pansan amangchan, athusei ngaiho chu bailam tah'in athusei chu aheth sah gang cheljnin, thutah chu santhei ding tah le hetjing theina dingin aseiphonge. Chuleh Jesun thusim aseija thulema ahilchun vetsah khat cheh aneijin, thulem khatin vetsah tampi ane ingaipoi. Jesu thulem seiho chun gotchom cheh avetsah na apeji'e. Tekah nan: Lk. 7:39-47; 10:25-37; 12:13-21; 16:1-12; 16:18-21; 17:7-10; 18:1-8; 18:1-14).

Jesun gospel sunga thulem 39 tobang ana seijin ahi. Hiche ho chu:

<u>SI No.</u>	<u>THULEM HO</u>	<u>MATTHEW</u>	<u>MARK</u>	<u>LUKE</u>
1.	Meivah lo kikhukhom	5:14-16	4:21-22	8:16-17; 11:33ff
2.	In kisa got/jat ni	7:24-27	6:47-49	
3.	Savun lui sunga lengpi twi thah	9:17	2:22	5:37-38
4.	Vonlui chungva vonthah kibeh	9:16	2:21	5:36
5.	Muchi thepa thulem	13:3-23	4:2-20	8:4-15
6.	Chang lhem thulem	13:24-30		
7.	Ankam mu thulem	13:31,32	4:30-32	13:18-19
8.	Chol thulem	13:33		

9. Gou kisel	13:44		
10. Twi kohchang manlutah	13:45-46		
11. Len thulem	13:47-50		
12. Kelngoi mansah	18:12-14		15:3-7
13. Mingai dam theilou lhachapa	18:23-25		
14. Lengpilei ja natongho	20:1-6		
15. Chapa ni	21:28-32		
16. Lengpilei lhou gilou ho	21:33-45	12:1-12	20:9-19
17. Moupui golvah	22:2-14		
18. Theichang phung	24:32-44	12:1-12	20:29-33
19. Numei som thulem	25:1-13		
20. Talent	25:14-30		
21. Muchi khangdoh thulem		4:26-29	
22. Inngah umlou/kitah loupa		13:33-37	
23. Sumpa hompa le sumba mini			7:41-43
24. Samaria miphapa			10:30-37
25. Ngaichat lai ja golpha			11:5-13
26. Mihao mingolpa			12:16-21
27. Kiging jing lhacha			12:35-40
28. Lhacha/soh kitah le kitahlou			12:42-48
29. Theichang galou			13:6-9
30. Jesu seijui hi aman lutje			14:25-35
31. Golvah loupai thulem			14:16-24
32. Sum mansah			15:8-18
33. Chapa vahmang			15:11-32
34. Neiching kitah lou			16:1-13
35. Mihaopa le Lazarus			16:19-31
36. Soh panna neilou			17:7-10
37. Meithai nu tei tei thilthum			18:1-18
38. Pharisee pa le Kaidongpa			18:9-14
39. Sum somkhat			19:11-27

BUNG – 16

JESU THILKIDANG BOLHO

Gospel'a thu kisei dohho hi Jesun thil kidang abol atamjo'e. Gospel sunho hin thilkidang kibolho alhen uva asutnu ahi. Thil kidang kisut lona jeh ahileh Jesu Christa chu Pathen Chapa ahi atahsan vanguva hichu hinna anei na dingui ahi (Jn. 20: 13).

Thilkidang hi latin pao *Miraculum* a kon kila doh, hichu thilkhat'in asuh lamdang, thil khat kidansah (thing causing wonder) tina ahi. Mitamtah in thilkidang aumthei dingin tahsan hih'uhén, thilkidang umthei ponte ti jongleo, Christianten melchihna kidang aum chu ida thei pouve. Chukitle tulai jenga jong thilkidang aumle aso nisim thusoh'in asun jingin ahi.

Gospel hon Jesu thilkidang bolpa ahi atiuve (Lk. 11:9; Mtt. 12:27; Mk. 3:22,23). Paul in thilkidang bol hi Lhagaoheng thilpeh ahi ati (2 Cor. 12:22,23; Rom. 15:18-19; 1 Cor. 12:9,10).

Jesun thilkidang bolho hi Pathen lenggam toh kisai ahi. Athilkidang bolhohi athusei/athuhil to kilhon ahi. Jesun agel dan himhim'in jong thilkidang bolhi anatoh thupi pen in agelpoi. Mikhen khat ahungun thilkidang bol dingin ahung solji'un ahin, aman abol nom jipoi. Ajeh chu atahsan lou jeh'u ahi. Jesun thilkidang hi ama kichoi atna ding le kidopsang nading (publicity) dingin abol ngaipoi.

Thilkidangin avetsah chu Pathein amihem te akhoh sah'in adamna dinguh leh ahuhhing chan na diu agel thupi'e ti ahi. Jesun thilkidang abol o hi leiset chungu Pathein let le lalna kiphon dohna ahi. Jesun thilkidang abolho jeng jonghi ajeh nei le athupi uma abol ahi. Tekah nan moupui golvah na'a thil kidang abol chu "kichen le insung hinkho athendan le aloupi na avetsah'in", Mi 5000 avah va na'ah Jesun "hinna dinga neh ding bolpa/sempa ahi" avetsah'in, Twi chungu lam ajot na'a hin "thiljouse chungu thunei pen" ahi avetsah'in ahi."

A. JESU THILKIDANG BOLHO ATHUPI (Unique) DAN: Jesun thilkidangho hi Pathen ahina photchetna dingle athusei to kijui dinga abol ahi. Jn. 2:11 na'a Jesun Galilee gam Cana kho'a thil kidang abol masat pen na chun, aloupina atah langin; aseijuiten atahsanui.

Themgao ho: Mose, Aaron, Elizah, Elisha, Peter, Paul ho chun thaneina kilason (Pathen'a kon thaneina) jalla thilkidang abolu ahin, Jesun vang ama thanei natah'a aPathen hina photchetna dinga abol ahi.

Jesun agomin thilkidang 35-40 tobang anabol Gospel sunga akimun ahi. Ajeh chu thaneina jouse ama'a ahin, aman aphatchet na abolji ahi. Lhep patep'a aum chun thilkidang bol ding anompoi (Lk. 4:3,4). Ajeh chu Satan thu aman nom lou jeh leh angaichat (agilkel) suhbulhitna'a aman chah nom loujeh ahi.

B. JESU THILKIDANG BOL HO AHOP LETDAN (Scope): Jesun thilkidang ho hi Pathen ahina chung chonna athaneina ahop (scope) alene.

- a. Thilsem chung (nature). Twi pi kinong aphothip (Mtt. 8:26-27)
- b. Lhagaoboh chung (Mk. 5:12-13; 8:28-32; 9:23,33; 15:22-28; 17:14-18; Mk. 1:23-27)
- c. Natna chung (Mtt. 8:13; 9:6; Jn. 5:9; mtt. 9:22; Lk. 14:2; Mtt. 8:15; 9:23; Jn. 9:1-38; Mtt. 11:5; 8:9; Lk. 17:19)
- d. Thina chung (Jn. 11:43 – Lazarus; Mtt. 9:18-26 – Jairus chanu; Lk. 7:12-15 – Meithainu chapa).
- e. Chena lhongpi khel lam (beyond nature): Twi'a kon lengpi twi sosah (Jn. 2:1-11); Mi 5000 vahva (Jn. 6:1-14); Twi chungu lam jot (Jn. 6:15-27); Mi 4000 vahva (Mtt. 15:32-39); Thei chang phung gaosap (Mtt. 21:18-22); Nga oisunga sum (Mtt. 17:27); Nga tampi amatsah (Lk. 5:1-11; Jn. 21:6; Athodoh (I Cor. 15:4; Rom. 1:4).

C. ATHIL KIDANG BOLHO PACHAT LOM AHIDAN (Credibility): Jesu thilkidang bolhohi Bible'a behdet chet ahin lahdoh thei hoi ahipoi. Hicheho hi milung suhthouna dingle Jesu choisangna dinga kijih maimai ahipoi. Adih tah ahin, mi tampi mitmu chang tah'a kibol ngen ahi. Kidang tah'a suhdam (miracle of healing) hi Doctor ho leh scientice hon adihmona/ahimo nading amu deh pouvin, ahin khat cha abolthei dehpouve. Jesu thilkidang bol hohi kidang khatseh (unique) ahi. Jesun thilkidang hohi chonhoilou le adihlou lama manchah dinga abol aumpon, adih le apha ding ngen ahi. John Baptist in Messiah ahi ahilou adoh chun seitho louvin thilkidang bolin apho chenne (Mtt. 11:3-6). Jesu thilkidangbol hilchet got hi Christa athaneina le Pathen ahina kisuneo/kisujum (insult) na ahijoi. Thil kidang hohi adih tah ahin, Pathen lekhabu'a kimu hohi kipah tah'a atah ahi ti'a lah ding ahi.

D. JESU THILKIDANG BOLHO AMANTAMDAN: Eiho dingin vang thilkidang hi Jesu Christa ei huhhingpu'u ahi avetsah kicheh tah ahi. Jesun ahina le Pathen ahina thilkidanga hin apho chene. Thilkidang hin Mihem ahina chung a amihina (superhuman) avetsah'e (2 Thess. 2:9). Anti-Christ in athaneina hi satan'a konna akilah ahin, Christa'in athanei na vang (super human power) Pathen'a kon alah ahi. Thilkidang in koima ahuhhing ding ahapon (Jn. 12:37), ahin mihem khat chu tahsana lamma apui thei ahi. Thilkidang hin tahsan ho atahsana asuhah ahi (Mtt. 8:22).

E. JESU THIL KIDANG BOLHO KIDEMNA (Objection): Kimkhat'in Jesu thilkidang bolho hi ngolhoi tah'in ahilchenui. Twi chung a lam ajot chu twithuh lou laija leiset chung a che ahijoi; Mi 5000/4000 avah vana'a chun chapang pa chun achanglhah Jesu apeh'a chu mijousen achanglhah cheh'u akilah doh'uva aneh'u ahi. Athi ahinsah hochu athi tah tah hilou a'imu ahijouve ti pouvin ahilchenui. Jesu thilkidang bol tahsan louho chu:

- a. Materialism (tahsa nopsah na lam le tahsa thil ngaisang'a lhagao lam khohsah lou) hon Pathen thanei na apai lhaovin, tahsa thanei na bou apomun thilkidang asang nompouve.
- b. Panthiest (thiljouse Pathen ahin, Pathen hi thiljouse'a um ahi) tihon law of nature (thil umdan) bou atahsan un thilkidang hi ahithe i poi atiuve
- c. Agnoticism (mitna mulou tahsanglou) hon thilkidang asang pouve. Ajeh chu amahon thilkidang hung konna pa atahsan lou jeh'u ahi.
- d. Naturalist (thiljouse angaina dola che ahi) tihon thil kidang hi angaina dol ahipoi tin atahsan nom pouve.
- e. Philosophy (vannoi leiset thil umdan lama chihgilna neiho) hon thilkidang hi lunggel alhangpi'a achejom na'asutang in santhei ahipoi atiuve.
- f. Optimist hon thiljouse hi ahoi na pen na um ahin, thilkidang angaipoi atiuve
- g. Adang tampin thil kidang hi aphotchetna (evidence) aumpoi tin atahsan nom pouve

F. JESU THIL KIDANG BOLHO

No	<u>Athil kidang bolho</u>	<u>Matthew</u>	<u>Mark</u>	<u>Luke</u>	<u>John</u>
1.	Miphah khat aboldam	8:2	1:40	5:12	
2.	Sepai jalamkaipa sohpa adamsah	8:5		7:1	
3.	Peter nupanu aboldam	8:14	1:30	4:38	
4.	Nilhah lama adamlouho adamsah	8:16	1:32	4:20	
5.	Twipi kinong aphothip	8:33	4:35	8:22	
6.	Vohchaho sung a lhagaoboh alutsah	8:28	5:1	8:26	
7.	Alang thi aboldam	9:2	2:3	5:18	
8.	Vaihomp a chanu ahinsah	9:18-23	5:22,35	8:40-49	
9.	Athilonga um numeinu damsah	9:20	5:25	8:43	
10.	Thilhavop paomopa apaosah	9:32			
11.	Mitcho ni kho amusah	9:27			
12.	Khutlang thipa aboldam	12:9	3:1	6:6	
13.	Thilhavop paomo, mitcho adamsah	12:22		11;14	
14.	Mi 5000 avahva	14:13	6:30	9:10	6:1
15.	Twi chung a lam ajot	14:25	6:48	6:19	
16.	Gentile numeinu chanu adamsah	15:21	7:24		
17.	Mi 4000 avahva	15:32	8:1		
18.	Chapang lhagao boh vop aboldam	17:14	9:17	9:38	

19. Nga oisunga hou inding kai	17:24		
20. Mitcho ni aboldam	20:30	10:46	18:35
21. Theichang phung agaosapma agot	21:18	11:12	
22. Lhagao thenglou anodoh		1:21	4:33
23. Nangong paotheilou pa adamsah		7:31	
24. Bethsaida'a mitchopa kho amusah		8:22	
25. Adouva mipi lah'a kon ajamdoh			4:30
26. Nga tampi amatsah			5:1
27. Nain kho'a meithainu chapa adamsah			7:11
28. Atingbong nu adamsah			13:11
29. Thongpoh veipa adamsah			14:1
30. Tiphah som adamsah			17:11
31. Thempu chungnung sohpa bilkol adamsah			22:51
32. Twisih lengpi tui asosah			2:1
33. Sepai jalamkaipa chapa adamsah			4:46
34. Bethsda'a nakong chatmopa adamsah			5:1
35. Apennapat mitchopa kho amusah			9:1
36. Lazarus athodohsah			11:43
37. Nga tampi aniveina'a amatsah			21:1

BUNG – 17

JESU THUPEH CHUNGNUNG HO

1. Lunghei (Mtt. 4:17; Lk. 13:24; Mtt. 6:33)
2. Tahsan (Mk. 1:15; Jn. 14:1; 6:29)
3. Pentah (Jn. 3:7; Lk. 10:20; Mtt. 12:33)
4. Lhagaotheng chan ding (Jn. 20:22; Lk. 24:49)
5. Jesu nungjui ding (Jn. 12:26; Lk. 9:23; Jn. 21:22; Lk. 5:27)
6. Taoding (Lk. 21:36; 22:40; 10:2; 6:28)
7. Tahsan (faith) Mk. (11:22; Jn. 20 Mtt. 14:27)
8. Bible khol/sim jing ding (Jn. 5:39; 15:20)
9. Evah vahsah ding (Mtt. 5:16; Jn. 15:16; Mk. 5:19)
10. Pathen ngailut na sangpen chanding (Mk. 12:30; Mtt. 4:10)
11. Thunei vaihom ho jana, ngailut na pehding (Mk. 12:17)
12. Iheng ikom ngailut ding (Mtt. 19:19; Lk. 6:31)
13. Neipap kiloset louding (Lk. 12:15; Mtt. 5:42; 6:19)
14. Phat lhem louding (Lk. 12:1, Mtt. 23:23)
15. Lungneng ding (Mtt. 11:29; Mk. 10:44; Lk. 17:10)
16. Sopi ngailutding (Jn. 15:12; Mtt. 18:10; 5:24; 17:4; Lk. 6:37)
17. Chamkim (Perfect) ding (Mtt. 5:48; Lk. 6:36)
18. Chihna (wisdom) neiding (Mtt. 10:16; Mt. 7:6)
19. Kipana thupha seiphongding (Mk. 16:15; Lk. 24:47; Jn. 21:15-17)
20. Ahungkit dinga kigosa umding (Lk. 12:40)
21. Thichanna kitah ding (Mtt. 24:13)

BUNG – 18

JESU HINKHO KICHAINALAM HAPTA SUNG

BETHANY KHO'A JESU (Saturday) Jn. 11:55-12:11.

Bethany hi John 1:28 na kisei Jordan gal langa Bethany hilou, Olive mol solam sanga um Jerusalem'a pat Mile ni'a gamlha Jericho jotna lampi panga um pa ahi. Hiche hi Jesun angailut Lazarus le asopiteni Martha le Mariam chen na kho ahi.

Hiche hi loupitah'a Jerusalem alutni masang ahi. Ajeh chu kalchuh kut chu nigup joule hipai ding ahitai (Kalchuh kut hi Thursday nilhum'a kipana Friday nilhun gei hiding ahi). Hia chun Jesu Lazarus te in'a ahung lhungkitnin, chukoma chun Marthan Jesu chu ajenlen, Lazarus chu ankonga Jesu toh atouvin, Mariam in ahalpi bei Spikenard thao mantam tah seer keh ahin choijin, Jesu kenga anun, asamin ateh ngimin, insung chu anamin adip'e (Jn. 11:1-3). Hiche spekinard thao hi India gama keh nard thing/hampa'a kon kiseum ahi. Mariam hin Jesu teho aneh laiija akenga anun ahin, hiche hin Mariam kineosah tah'a Christa ajen (devotion), ahou (worship), chule angailutna avetsah'in ahi.

Mark 14:3 in nard thao (spikenard) atin, *spikenard* hi Greek paova 'nard thengset' tina ahi. Hiche thaohi India gama nard thing/pahcha (nard plant) akon kiseum ahi. Mark'in atheng (pure) ahapbe'in, hichun halpi beihel athengset aman tamdehset ahi aseina ahi. Amantam dan chu Mark 14:5 in denarii 300 man ahi ati. Denarii khathi nikho thakhat man ahin, nikho 300 thaman ahi. Tulai pasal nikho thaman hi 500 ahin, hichu ahileh Rs. 1,50,000 man ahi. Hiche thao chu denarii jathum (makhai jathum) man ahin, dinarii khat hi nikhotha lhingset'a mikhatnin alo ahin, kum khat lo'a kicho doh'a ahibepe. Jesun Mariam natoh chu Jesu akivui nading ni'a kibol ding avetsah ahi ati. Mariam in ahelou vanga Caiaphas (11:49-52) dan deuva ahunglung ding phat avetsahna ahi.

PALM SUNDAY

LOUPI TAH'A JERUSALEM ALUT

(Mtt. 21:1-11; Mk. 11:1-10; Lk. 19:28; Jn. 12:12-15)

Hiche hi Bethany agavil ni ajing ahi (Jn. 12:12). Pakai Jesu dinga leisetna ahunglona kum thum valset sung anatoh ho lah'a achaina pen kipatna ahi. Pakai Jesu Jerusalem'a dinga ahung kipat doh hi Lk. 9:51 langa Galilee gam langa kon ahung kipan doh ahitai.

Bethphage hi Bethany koma khoneo cha Olive mol noi solam pang (SE of Mount Olive) Jerusalem solam (E) ma um ahi. Hiche khoneocha hi Jerusalem alut ding to kisaija kisei tilouvin mundang a akimupon ahi. Bethphage hi "theichang min lou'in" tina ahi.

Olive mol hi Jerusalem le Bethany kah'a um ahin, Jerusalem houin mai laitah Kidrom phaicham khel/gal solam panga um ahi. Olive mol hin amin Olive kiti hi phatkhat laiija anatom chah kheh olive thing phung ho'a konna akilah ahi.

Jesun Bethphage le Bethany alhun ding konin aseijui ni (Peter le John hidinga ginmo) asollin amaijuva kho (Bethphage hi dinga ginmo)'a chu lut'a sangan apile anou kihen chu hin sutlha'a hin pui dingin asolin ahi. Mathew bouvin sangan api ajaosah'in gospel danghon anou bou, mitoukhah na lou bou aseijui. Api ahin kipui lona jeh chu anou hin kilhon pi ding ahi. Chuleh adang hon api ajaosah lounao ajeh chu Jesu anou chungga atoujeh ahi. Jesun aseijui teni jah'a min ipi dinga nasut lhon ham atileh Pakai'in manna nom aneije gahti honin ati. Ajeh chu chulaija chu mihon Pakai Jesu le aseijui te chu ahelou mamau ahitan ahi. Pakai Jesun che'a ima jouse aga gontup masatna aseijui teni

asol ahapon, a'Pathen hina kilahna ahi (9:9). Hiti chun Jesu chu sangan nou chungu chun atouvin Jerusalem ahin jonne.

Scholar khen khatnin Jesu loupitah'a Jerusalem ahunglut ni hi Sunday Date 9, Nisan lha, AD 30 kum ahin, Artaxerxes in Judate Jerusalem'a kile kit dinga athupeh joukal kum 483 lhin na chet ahi atiue. Hichu Daniel 9:24-27 na'a hapta 70 kisei ho lah'a hapta 69 lhinni ahi.

Dan. 9:24-27 chom lama hilchen leuhen: Messiah lenggam (kumsang lenggam) kitundoh nading phat hi hapta 70 (kum 490) vat nalai ahi (v.24). Persian lengpa Artaxerxes'in houin sahphat dinga thupeh anei (ca.445 BC - Neh. 2:1-8) japat Leng chapa Messiah hung gei chu hapta 7+62=69 (kum 49+434=483) hiding ahin; Nehemaih le Malachi phat (OT) kichaija chu hapta 7 (kum 49) kichai ahitai. Hiche'a pat Messiah ahung masat kikah chu hapta 62 (kum 434) ahin; hichu loupitah'a Jerusalem alut (9 Nisan AD 30) nikho'a llinga ahi (v.25). Hiche jouteng chule Messiah chu kisatlha ding (thiding) Jerusalem le houin jong kisubei ding ahi (v.26). Jesu thi jou kum 7 sunga thil lhung le chang 27'a kisei khu akitoth pon; hichu ahile hapta khat (kum 7) vat pa hi Rapture le Christa alenggam tungdoh dinga avela ahung kit kikah'a kisei thoh hahsa khang (tribulation) kum 7 (Dan. 12:7-12) khu hiding ahi (Matthew 24-25 hilchet ven). Houbung khang hi khang ki'im (mystery) ahin, malai (OT) mite ana kihetsah lou ahi (Rom. 16:25; Eph. 3:3-5, 8-10).

Masanglaija leng chang dingho chu leng chang dinga khopi/leng'in ahin jot ji tenguleh sakol chungu hungtoug jiu'uh ahin (I Kgs. 1:38-40), hinlah Pakai Jesu vang chutobang louvin sangan chungu ahung touve. Hiche hin avetsah chu: i. Leng ahina, ii. Chonphatah/thudihtah ahina; iii. Huhhingna hinpo ahina; iv. Akineosah vetsahna (Zech.9:9) ahi. Chukitle masang lai lengho chu gal konna ache tenguleh sakol hattah chungu touvuva gal kon jiuva ahin, chuleh galjouva ahung kile tenguleh chamna vetsahna'a sangana hungtoug jiu ahi. Hiche in avetsah kit chu Jesu chu Jerusalem'a ache chu gal bolding hilouva chamna a hung ahi akilange.

Jesun sangan nou koima tou khah nalou va atou jeh chu: Judaten ganhing koima atoukhah na lou chu thilthenga kimang dinga phatah/hoitah'a agelu ahin (Num. 19:2; Deut. 21:3; I Sam. 6:7) hijeh'a chu Jesun koima toukhah na lou sangan nou athenga kigel chu amanchah ahi.

Hosana kiti hin Neihuh hingun tun/ tun huhhing na neipuun tina ahi. Hiche hi taona thucheng ahi. Ahin hilai munna hin lemna thuchengin amangui. Hosana hi Ps. 118:26 apat kiladogh ahi. Ps. 113-118 hi Hillel tin akihen hiche hi kut laileh adeh'a lhambuh kut, hou'in thensona kut leh Kalchuh kut teng choir hon jingkah seh'a asah jiu ahi.

Jesu loupitah'a Jerusalem alut jouvin Bethany kho'a ageh dingin akile kittai (Mk. 11:11).

MONDAY

THEICHANG PHUNG KIGAOSAP

Mtt. 21:18-19; Mk. 11:12-14

Monday nikho'a theichang phung kigaosap tilou Jesu toh kisaija thilsoh hochu:

1. Greek mite thilthum/ ngehna (Jn. 12:20-36)
2. Jesu atahsan louho akon akihei mang le adonbutna (Jn. 12:36-50)
3. Jerusalem huin asuhteng

Palistine gama dinga theichang hi an phatah ahi. Akiphu'a pat aga kah hin kum 3 alutnin, ahung ga pat teng kum khatna nivei vei ga ahi. Ahin hiche theichang phung hin adobou aneijin agapoi. Theichang ana phatdan chu aleipha laitah'a keh hiding, chuleh apal jong hiding ahi. Ahim hima jong April lha, hiche phatlai tah chu theichang ga laijong hilou ahi, ajeh chu June lang le bou avella ga pan kit ding ahi. Hijeh'a chu Mark'in theichang gaphat hilou ahi (Mk. 11:12) ati. Theichang

gaphat hilouva ibola Jesun theichang ahola aga amulou jeh'a agaosap hintem! Agilkel lunghan man hilouva vetsahnom aneijeh ahi.

Jesun hilaija lampanga keh theichang phung hi lesson/kihilna ding: Israel te lhagao lama aphant lhemnao le agabei danu avetsah na ahi. Theichang phung hi OT ah Judate seinan akimang jingin (Hos. 9:10; Joel 1:7; Mic. 7:1-2; Nah. 3:3; Zech. 3:10); Chule Theichang ga beihi lhagao lamma ga sodohna dinga chanvou phatah achan vanguva ga seplou Israelte chungga Pathen thutanna vetsah na'a jong kimang ahi (Jer. 8:13; Joel. 1:12 cf. Mt. 3:8). Theichang chu gah galvet dinga ado hoidan chu aga dinga kilomtah ahin, ahin anaija ivetleh aga umlou banga; Israelte jong chutima ahiuve. Hijeh'a chu theichang phung agaosap hin Israelte aga loujeh uva achunguva Pathen gaosapna hunglung ding vetsahna'a abol ahi. Jesun theichang agaosapma agot jeng bangchun Isreal jong kum 30 jou AD 70 'in Pathen gaosapna chung Jerusalem le Judah chungga alhungin, Romanten asuse deh'un ahi.

Matthew in apet petin ago pai jenge atin, ahin Mark in ajingin agoi atin, hiche hin avetsah chu apetna thipai hiding ahi'a agop lhah hi ajinga kilangah hiding ahi.

JERUSALEM HOUIN ASUHTHENG (Matt. 21:12-17; Mk. 11:15-19; Lk. 19:45-48)

Gospel li ho'a kimu dungjujin Jesun Jerusalem Houin hi khatvei hilou nivei ana suthengin ahi. Synoptic Gospel sunga kimu khu Jesu kikhetbeh ding kon, Kalchuh Kut masang, Loupi tah'a Jerusalem alut ajing nikho ahin, Gospel John 2:13-22'a kisei khu Jesu ministry kipat til; Cana kho'a twisih lengpitwi asosah jou, Nicodemus le Samaria numeinu toh akimuto masang ahi. Akikhehna chu Jesun Houin asuhtheng masat chun Houin vaipohon Jesu chu anelkal/akidinte pi paijun (Jn. 2:18); ahin aniveina asuhthenga vang hiche ho thu kisei aumpoi. Amavang anivei channa'a asuhtheng chungga hin Synoptic Gospel hon Jesun mipi joh chu asosal'in, hilnan amang paijin ahi (Matt. 21:13; Mk. 11:17; Lk. :46-47). Ahin ani hin Kalchuh Kut masang ahigelin ahi.

Jerusalem Houin hi 19-20 BC'a kisapanin, kum 46 sung kijom thetnin akisan, akhongai kitji'in, AD 70 kuma Rome lengpa thupeh'a General Titus'in asuhmang geijin jotheng ahi hih laiye (Scholar kimkhatnin vang akisuh mang kon kum gup masangin akijou theng bepme atiuve). Jesun Houin asuhthenga hi akijotheng loulai vanga alenjo chu kijouva manpat hija ahitai. Jesu phatlaija din Jerusalem Houin hi in thupipen, vetnom umpen khat anahi. Houin'a thunei vaibol le thempuho chu Sadukaiho ahiuvin ahi.

Thil kijohna mun (indan). Herod'in asah Jerusalem Houin hi dan li'a hopkhen ahi. Asungnungpen chu muntheng, Thempu dan (court of priest) ti'a jong kihe, maicham le muntheng chungnung uma ahi. Adan nina chu pasalho indan (court of men) ahiloule Israelte indan (court of Israel) tin jong akihei. Athumna chu numeiho indan (court of women) ahin; adan ponungpen chu gentile te indan (court of gentile) ahi. Gentile te pindan kismlo na chu chidang namdang hon Pathen thu ahung ngai nadiu mun, chuleh Israel ten gentile te henga Pathen thu aheth tohsah na diu mun dinga kism ahi. Ahin chidang namdangho henga Pathen thu hethohsah malah'a hiche mun chu kiveina, thil johna muna aneiju ahi.

Thil joh hohi thempu insung hiding ginmo ahi. Historian hon thempu chungnung masa Annas chu achapate to kitho'a hiche thiljohna lampanga hi mopo (manager) ahi atiuve. Kimkhat kitchen midanghon thempuho koma phalna akilah uva, amaho phalna noiya ajoh'u ahi. Ahoijoh chu hitaleh thempuho sumtong nehna hija ahi.

Thil kijoh hochu khatna'a: Pathen thupeh dungjuija kalchuh kut kilhaina'a thading gancha: adeh'a kelngoi/kelngoinou, vapal leh adang dang ahin, chuleh anina'a Pathen thupeh dungjuija pasal kum 20 chunglam jouse longman (Houin kai) ja to ding sum (Exo 30:13,14; 2 Chr. 24:9) ahi. Alhangpi'a Houin muna thil kijoh ho chu thilphalou ahipoi. Akijohna mun adih lou jeh'a Jesu lunghang ahi.

Ibola Houin muna kijoh ham? Masanga chu kilhaina dinga gancha joh hohin Kidron phaicham gal Olive lhang bul vella'a chu anajoh hui ahi. Hinlah amun kilem chang joh nading hintin hiche phatlai hin vang Houin mun, Gentile te Pathen houna muna ahung kichon lutnun, hikom chu kiveina munin amang taovin ahi. Jerusalem Houin'a kilhaina boldinga hung, adeh'a Kalchuh Kut mangdinga hung ho hi Judea gam vella ho goh hilou vannoi gamtina kona hung kikhom jiu ahi (Acts 2:9-11). Amaho dinga chu achen nao gama kona ganlhaina'a toding gancha hinkai ding chu hahsa ahina bana ijem ti'a khat touvin ahin kai jongleh thempu hon adeipeh ji louvu ahi. Hijeh'a chu Houin muna chu thempu hon nolna bei ahi ti'a phatsahna apeh houchu mundanga sanga mantamjo'a ajoh uva, hichu Pathen lhai dinga hunghon akichoh uva Pathen henga ganlhaina'a ato jiu ahi. Jesu lunghan na dehset chu thempu hohin mipi gelkhohna jeh'a abolu hilouva, amaho phatchomna ding, sum munadinga kiveina abolu chu ahi.

Houin muna sum kilheh lona jeh chu Houin'a hi Roman sum le sum dang dang kitoh ngailou, Judate sum (Jewish coin) bou chu kitoh ji ahi. Sum kilheh jongchu ase ahipoi. Amun dihouna banna adih cha'a alheh loujeh'u ahi. Atong avala alheh uva, kiveina anei jeh'uva Jesu lunghanga asum lhenghou chu abohlhah peh ahi.

Ka In chu taona in kiti ding ahi: Masanglai goh hilouva tuni geija Houin hi Pathen houna in, Pathen chenna in, Pathen in ti'a alhangpi'a ngaito ahi. OT le Gospel phatlai dehdeh'a chu Jerusalem Houin hi Pathen chenna muna dana uma, hijeh'a chu Jerusalem Houin muna hi pumgo thilto le adang dang tona, chuleh Pathen thu kihilna muna aneiju ahi. Chunglanga kisei bang Judate goh hilouva gentile te jengin jong Pathen aholna munu, Pathen thu ajahna diu mun, chule ataona diu mun ahijeh'a gentile court (gentile indan) jong kiseum ahi. Mark Gospel'in ase hoi lneh'in ahi. "Ka in chu namtin dinga taona in kiti ding ahi" (Mk.11:17). Namtin atihin Judate goh hilou vannoi namtin ahop ahi. Amavang Judami hilou gentile te chula asung dan lut phal ahilou jeh'a gentile court kiseum ahin, hinlah hiche mun chu houvaipo hon kailhanga ana neijuva, gucha michom kokhuh'a asemboh uva, Pathen loupina ding hilouva amaho phatchomna ding leh amaho loupina dinga Houin chu asuhboh'u ahi.

TUESDAY

(Mtt. 21:23-25:46; Mk. 11:19-13:37; Lk. 20:21-36)

1. Theichang phung got leh theichang phunga kon kihilna (Mk. 11:20-26)
2. Thempu chungnung, danthu sun ho leh upa ho thudoh (Mt. 21:23-27)
3. Thulem thum – Chapa ni thulem (Mt. 23:28-32), Lengpi leile alei lhouho thulem (Mt. 23:33-46), Moupui golvah thulem (Mt. 22:1-14)
4. Juda lamkaiho thudoh
 - a. Pharisee ho le Herodian ho thudoh (Mt. 22:15-22; Mk. 12:13-17; Lk. 20:10-26)
 - b. Sadducee ho thudoh (Mt. 22:23-33; Mk. 12:18-27; Lk. 20:27-40)
 - c. Pharisee ho le Danthu sunho thudoh (Mt. 22:34-40; Mk. 12:28-34; Lk. 10:25-28)
5. Jesu thuhil ho (Mt. 23-25; Mk. 12-13; Lk. 20-21).

WEDNESDAY

1. **Jesu that dinga akihou sommu** (Mt. 26:1-4; Mk. 14:1-2; Lk. 22:1-2; Jn. 11:45-53) Jesu that dinga kihousom ho chu:

i. Thempu pipuiho: Amahohi thempu chungnungho – thempu maimaiho lah'a akilhengdoh mi 24 ho (Lk. 1:8) ahivin, Sanhadrine member ahivun, Jerusalem houin sunga thunei vaihom le thempuho, alhangpi'a Sadukaiho ahivue.

ii. Danthu sunho: Danthu sunho hi danthu hilchet chung changa thaneina jouse kipeuva ahi. Amaho hi atamjo Pharisee ahivue. Hiche danthu kisun mipiho henga hilsonho chu Rabbi/houhil kitu ahi (5:20 hilchet ven).

iii. Upaho: Amahohi kikhopna in (synagogue) 'a lamkai (tulai pastor/head deacon) ho kiseina ahi.

iv. Caiaphas: Caiaphas hi AD 18-36 sunga thempu chungnung ahi. Midang sanga thempu chungnung panmun atuhsot hin Rome le Herod insung toh kiguijopna phatah anei avetsah'e. Caiaphas hi ama masanga thempu chungnunga anapang Annas tupa/mahpa (son-in-law) ahi (Jn. 18:13). Roman gamvaipo Valirius Gratus in Annas thempu chungnung chu ahaisah'a Caiaphas hi apansah ahi. Caiaphas hi AD 36 in Pilat toh thakhatna haisah ahi. Aman houin chung thunei na jouse aneijin lamdih lou lama kivei miho a kon chun atong tampi pi amujin ahi. Amahin Jesu hi changval tah'a ahot'a achunga thilse bou agelkhum ahi.

2. **Juda Iskariot Jesu joh dinga anop** (Mt. 26:14-16; Mk. 14:10-11; Lk. 22:3-6)

Juda Iskariot chu Juda houlamkaiho dinga ataonao donbutna hiding dan ahi. Judas'in Jesu matsah dinga agaseihin, ahenguva johdoh maimai ding hilouva, Jesu chu thutana muna adinteng achungthu hettoh sah dinga anopna agaphon dohna jong ahi. Sum muna ding ahiphot le ijakai bolding angapchat ahi (Jn. 12:6).

Dangka 30 hi Exodus 21:32 dungjujia soh kilhatdohna man ahi. Hijat manhi kelnoiching kipaidohpa man dinga Zacheriah'in gaothu'a ana sei ahi (Zech. 11:12). Judas chu itobang dangkha apah'u akiseichet loujeh'in Jesu kijohdoh na manhi ijat chet hidingham khotdoh thei ahipoi. Ahin tamthim vang hiding ahi. Kinop tona aneiju to lhonchun Thempu pipuihon Judas chu Jesu Christa'a kon ahuhhing diuva kinepna neitah'a anga'u ahitai. Chule Judas injong sum akilahto lhona akitepna chu amolso tei nadinga pan nasatah alan, aphot agomkom aholtan ahi. Hiche jonghi Pathen thusei guilhuna ahi (Ps. 41:9; 55:12-15,20,21; Zech. 11:12-13; Jn. 6:64,70,71; 13:18; 17:12).

THURSDAY

(Mtt. 26:17-26:56; Mk. 14:12-14:52; Lk. 22:7-22:52; Jn. 13:1-18:12)

1. Jesu le aseijui ten Kalchuh Kut an aneh'u (Mt. 26:17-25; Mk. 14:12-21; Lk. 22:7-13,21-23; Jn. 13:21-30)

2. Jan anjon (Mt. 26:26-30; Mk. 14:22-26; Lk. 22:14-20)

3. Indan chung houlimna le taona (Jn. 14:1-17-26)

4. Gethsemani honna Jesu (Mt. 26:36-46; Mk. 14:32-42; Lk. 22:39-46)

5. Jesu amatnu le achung thu kitan (Mt. 26:47-67; Mk. 14:43-65; Lk. 22:47-55; Jn. 18:3-24)

6. Peter'in Jesu aseilep (Mt. 26:69-75; Mk. 14:66-72; Lk. 22:56-62; Jn. 18:15-18, 25-27)

JAN AN JON NUKHAH

Judaten Kalchuh Kut hi Egypt gama asohchan naova kona huhdoh'a aumu melchihna'a aman jingu ahi (Exo. 12-13). Kalchuh Kut hi Cholsolou Changlhah kut to kimat ahi jeh'a hapta khat aman jiu ahi (Lev. 23:5-8). Hiche Kutna hi pasal kum 12'a lhah achunglam jouse Jerusalem'a che cheh jiu

ahi. Jerusalem'a mitam laitah ahin, Jerusalem khopi'a chengho sanga tam hungjiu, mi 300,000-400,000 ho kikhom jiuva ahi.

Jesun aseijui te toh kalchuh kut an aneh nadingu mun hi koima hetlouna munna bol asom mong ahi. Ajeh chu Judahon helev asuh boi dinguh adeh'a Juda Isacariot jengin jong anahe masale Juda houlamkai/vaipoloi anasei peh masat ding chuteng aphaltouva Jesu matna umding ahi.

Kalchuh kut an neh phat chung changa synoptic gospel leh John gospel aki kalun ahi. Synoptic gospel in Jesu le aseijuiten kalchuh kut an chu Thursday (Nisan 14) nilhah'in ane'ui atin, chuleh Jesu chu Friday ni'a kikhai lih in aseije. Ahin John in Judate chu Friday nin kisu boh louva kalchuh kut an aneh theina dinguvun Roman gamvaipo thutan na'in (pretorium) chu alut pouve ati (Jn. 18:28). Chuti ahileh Jesu leh aloiho chun kalchuh kut an chu aphant masang Thursday ni'a aneh'u tina ahin, Judate vang ane hih laiui. Jn. 19:14 na'ah John in Jesu thukitan le akikhet beh chu Kalchuh kut dinga kigot nikho ahi atin, kalchuh kut aneh jouvu ahipoi. Chuti jeh'a chu Jesu chu Kalchuh kut kelngoinou kitha phat laitah'a kithat ahi (Jn. 19:14). Achuti leh ibolla Jesu leh aseijuiten kalchuh kut an chu Thursday nikho'a aneh'u ham?

Ajeh chu Judate nikho sim dan kibah loujeh ahi. Joshephus, Mishna le Judate lekha kison lui ho'a kimu dannin Sahlam (N) Palistine'a cheng hon (Galilee gamsung) Juda tailou Jesu leh aseijui te sese chen na mun ho chun nikho hi nisa so'a pat nisa so kit geija nikhat'a asim u ahi. Hiti'a chu Pharisee ho atamjon jong hiche nikho sim dan hi amanu ahi. Hinlah Lhanglam (S) Palistine (Jerusalem le avel lah) gama chengho chun nikho hi nisa lhum'a pat nisa lhum gei hi nikhat na asim u ahi. Hijeh'a hi thempu ho jouse Jerusalem le Avella chengho ahi jalluva amahon hiche nikho sim dan hi ajuiju ahi, ati.

Hiti'a chu Jesu leh aseijui ho Galilee'a kon ahi jaluva kalchuh kut chu Thursday niso a kipan na Friday niso'a kichai ja agellu, ahi a lah Jesun man ho chu atamjo thempu ho leh Saducees ho ahi jeh'uva kalchuh kut chu Thursday nilhuma kipana Friday nilhum'a kichaija asim u ahi. Hiche kikhel na jong hi Pathen thil gon ahi. Ajeh chu Jesun aseijui te toh kalchuh kut an ane khommun, kalchuh kut sat ha phatin tha'in aum man thou thouvun ahi.

Kalchuh Kut an kineh dan chu: 1) Lengpitwi san twitoh kihal chu adonjiu (Lk. 22:17); 2) Lhagao le nunle khan thending angaikhoh dan vetsahna'a akhut asop jiu (ceremonial washing of hand); 3) Egypt gama bolgentheija aumu melchihna'a anche kha anehjiu; 4) Lengpi twi ani channa chu adonkit jiu – hiteng chule insunga mipa/alengpen chun Kalchuh Kut thudol ahilchet ji; 5) Chujoule Hellel atiu (Ps.113-118) chu amasa ni chu asahjiu; 6) Kelngoinou chu ahindop doh uva, insunga alenpen chun sa themkhat le chol solou changlah ahopji; 7) Chujouteng lengpitwi athum chana chu adonkit jiu ahi. Hiche lengpitwi khon thumna hi "phatthei chana khon" (v.27; 1 Cor. 10:16) kiti ahin, Jesun chonset suhbeina dinga kisodoh kathisan toh vetchev ti'a aman chu hichepa hi ahi.

Hitichun kalchuh kut an aneh jouvun Jesun aseijui te keng asilpeh'in, kineo sah thu ahillin, alung mon nadingun thu tampi aseipeh'in, adalhad nunga akiman chah na dinguh thu leh lhagaotheng hungkum dinguh thu aseijouto lhonnin Ama ding, aseijui te le mijouse a din taona amangin (Jn. 13:1-17:26); Gethsemani hon lang ajon taove.

GETHSEMANI HON'A JESU TAO

Thao hehna mun tina ahi. Kirdon phaicham le vadung gal (Jn. 18:1), Olive thing tampi kena Olive molsang bula um ahi. Hikom munhi Jesu le aseijuite phatseh'a akimuto naomun ahi (Jn. 18:2). Hiche honsunga hin malaija anakeh olive thingho chu tun jong aum nalaije. Jesun Gethsemane achedingu ase masatlou vanga phatseh'a akimuto naomun ahijeh'a Juda Isacariot chun melmaho chu ahinpuija ahung matnu ahi. Gethsemani alhunun Jesun thina khop hellin kalung ahesoh'e ati. Jesu hesohna chu amasanga akisuh genthei dingle athi ding dan kichatna ahipon

chonset jeh'a Pathen lunghan na khon dimset adon ding jeh ahi. Mtt. 27:46 na'a lungna tah'a aka/apen chun lunghan na khon akipeh chu ichanna na aham avetsah'e. Jesu lungnhem/lungkham na hi midang hile athipi ding tina ahi. Ahin ahunglo na atoh lou laijeh'a hing ham ham ahi. Alungnhem nachu thina khop hel (heart attack) ahi atin ahi.

Khon: Khonhi Thulhun luija chonset chungu Pathen lunghana seinan akimang jingin ahi (Isai. 51:17,22; Jer. 25:15-17,27-29; Lam. 4:21,22; Ezek. 23:31-34; Hab. 2:16). Ajing nikho lehin Christan mitamtah chonset apoh ding ahin (Heb. 9:28), Pathen lunghana khonteh chu achunga chuding ahi (Isai. 53:10,11; 2 Cor. 5:21). Khon chu ama dinga deilou umtah hijongleh Pathen lungdei ahi jeh'a deitah'a alah'a, Amihem lung ngaichat chu Pathen lungdeija dinga kiphaltah'a apehdoh na ahi. Lungna tah'a apena aka (27:46) chun lunghana dimset khon akipeh ahahsat/anat dan chu atahlange. Hichu chonset lhingsetna apoh'a aman lhingsetna apeh chu ahi.

Hiche khon hi keija konin kitolmang jenghen; ahivangin Keima lunggot bang hilouvin, nangma lunggot bang hijohen ti'a aseih Christa dei le Pathen dei kikalna ahipoi. Christan Pa Pathen henga a leiset mi hina pa lunggel/lungdei chu Pathen lamma apeh doh ahijon; Christa chu Pathen lungdei bol dinga kipedoh'a hung ahin akipeh dohna pa chu athah geldoh ahi. Tahsa mihing hina Pathen lunghan na achunga kisung lha ding chu angap lel jeng vanga Pathen lungdei ahijeh'a deitah'a akilah aphondoh ahi.

Ul thisan'a long (Lk. 22:44): Hiche hi tijat umtah dinmun ahin, Hamatidrosis akiti. Mihem khat thisan ti'ula ahungpot doh tina ahi. Hiche hi mihem lungkhamval, lungnatval le tahsa gim/chol jeh'a soh ji ahi. Mihem khat vun sunga athajung/thigui chu hung pomma hungpoh keh'a thisan chu ol toh kihalla hungpot doh ji ahi. Hiti'a hi mihem thithej ja thijong thi ji ahi.

JESU AMAT NU

Jesu Gethsemani honna thum vei atao jouva aseijuite kom thu asej laiija Seijui 12 lah'a khat Judas in mihompi chemcha le moltum kichoija hungcho chu thempu chungnung, danthusun ho leh upa ho (Sanhadrin member) ho'a kon thusah'a hungu ahi. Mihompi hi Jesu thading, mandinga hung kilhengchil chet uva hungu ahi. Amaho chu Juda Iscario'in ahin lamkai ahi.

1. **Sepai hon:** (hiche hi Rome sepoy honkhat, Cohort kiti alhingsetna sepoy 1000 ahin, 760 kenglam sepoy le 240 sakol sepoy ahiuve. Ahin alhangpi'a na atoh tenguleh mi 600 ahijiuvin, kahlah lah leh alhompenin mi 200 jong hi cohort akiti jiuve). Rome sepoy hohi aum na amun dih tah'u chu Caesarea ahin, hinlah kut lai hileh Roman sepoy hohi aumna mun dih tah'u chu ahin dalhah uva Houin kom Antonia Fortress kiti muna chu Kut laiija boina umtheiho sunveng dinga hung um jiuva ahi. Amaho hin chemcha angaina'a akichoijiu ahi. Sanhadrin member hohi Pilate koma cheuva sepoy honhi agathum masat'u hiding ahi.

2. **Sottol le ho:** Amaho hi Jerusalem hou'in ngah sepoy ho ahiuvin amaho hi angaina'a atoh uchu mimal/thutan dinga gaman ji ho ahiuve. Amaho hin moltum bou achoi jiuvin ahi (Jn. 18:3 cf. Mk. 14:43).

Hi'a chun Jesu amale ama ana kipedoh in ahi (Jn. 18:4-9)

FRIDAY

JESU THU KITAN JATNI (Houlam leh politics/secular lam)

Judate noina houlamin thum vei achung thu akitanin; tahsa lam kivaihopna (politics) 'a hin Roman thutanna noina thumvei ma achung thu akitan kitne. Agoma Jesu hi 6 vei pansa achungthu kitan ahi.

JUDA TE NOIJA HOULAM TO KISAIJA ACHUNG THU KITAN

1. Annas thempu masang (Jn. 18:12-23). Annas'in thempu chungnung dinmun hi AD 6 apat Pilate masanga gamvaipo Valerus Gratus'in AD 15 kuma ahaisah geija atuh ahi. Thempu chungnung ahitah lou vangin Annas hi thempu dinmun chungna tha anei mama nalaijin, mipin jong amahi thempu chungnung tahbeh danna angaito jing nahlaiju ahijeh leh achapa 5 le atupa/mahpa Caiaphas hin kilhapeh'a thempu chungnung dinmun alo jing jeh'u ahi. Dan ngailou va Judaten Jesu Annas henga apui masat nao hi Houvaipoloi (sanhadrine) ho gangchela ana kikhop kim man na ding u ahi. Ajeh chu thutan na aban hi houvai poloi ang hiding ahitai.

Judaten ana boipi penu chu Jesun Pathen chapa kahi ati chu ahi (Jn. 19:7) Judate thutan dungjui tah'a chu themmo kichan pa chu thukidong pai ngailou ahi. Ahetoh ho'a pansa'a kidong ding ahi. Annas chu thempu chungnung hitalou ahi'a jana changnalai ahi jeh'a hitobang dan chu aman ajui ngai asah lou ahi. Ahin Jesun dan chu ahetejeh'in aheto angaichat aseije (Jn. 19:20,21). Annas in adoh thupi pen chu Jesu seijui te chungchang le Jesu thuhil ahi.

2. Janlajja houvaipoloi angunga Jesu (Mtt. 26:55-68; Mk. 14:53,65; Lk. 22:54). Annas in Jesu chu akikan pumin Caiaphas henga asoltai. Hiche thutan nahi thempu chungnung in'a aneiju ahi. Hiche hi jankhang kim le ah masa khon kikhah ahi. Hitobang'a jana thutan hi angai hilou ahi. Ajeh chu janle hitobang thu hi kitan ngailou ahin (Mtt. 27:1). Chuleh thutan hohi hou'in mun le mipi masanga bou kibol ji ahi (Mtt. 27:2)

Janlajja Jesu themmo na ding akhol jing vangun amu pouvin, ahe toh'a tampi le jouthu'a hehse jong atamun ahin aheto holeh ahehse ho jengjong akitoj ji pouvin. Hiti'a athemona aholmo phatnun Caiaphas ading doh'in Pakai Jesu chu Pathen hing minin ahahselin, nangma Christa Pathen chapa chu nahin? tin adongin aseisah tai. Hichun Jesun naseikhai ati (Mtt. 26:64; Mk. 14:62; cf. Ps. 110:1; Dan. 7:13). Hichun amahon pansatna hoitah kimunan aneijun, thempu chungnung in aponsil abot eh'in ahi. Hiche hin sangtah'a lunghem na avetsah ahi (II Kgs. 19:1; Job. 1:20; Jer. 36:24). Ahin thempu chungnung hin aponsil abo'eh ding phal hilou ahi (Lev. 10:6; 21:10). Ahin Talmun'in vang Pathen taitom amuteng uleh abolthei dingun aseije. Ahin hilajja Caiaphas thilbol hi bolthu ahin, Jesu themmo chan na dinga apansatna ding akimu na ahijoi.

Hichun amahon Jesu thu thina changei chang dingin themmo achan pajun, achil aset khumun – Judate dinga mimajja chilset hi kidan umpen, thet umpen le jumso na lenpen ahi (Num 12:14; Deut. 25:9). Apet pet'in Jesu chungna agit lounao sangpen chu aphong doh'un, alungthimuva Pathen aheto lounao chu Jesu achup/asuh'u le avoh na'u chule Jesu athudoh naova kon hetdoh ahi.

3. Jinkah'a houvai poloi angunga Jesu aniveina'a achungthu kitan (Mtt. 27:1; Mk. 15:1a; Lk. 22:66-71). Jingpi matah'in Sanhadrine ho ahung kikhom kitnun Jesu chu lhangphonga mipi masang le thupi tana'a achungthu chu tanlah ding asom taove. Amahon Jesu chu adoh ngai sau Christa nahin tin adong kit'un, Jesun jong angaima bangin adon but kit'in ahi. Hichun mipi kiloi khom chengse chun Jesu chu Pilate henga apuitaove.

ROME TE DAN NOIJA POLITICS TO KISAIJA JESU CHUNGTHU KITAN

1. Pilate anga Jesu thu kitan (Mtt. 27:2,11-14; Mk. 15:1-5; Lk. 23:1-5; Jn. 18:28-38):Hiche hi jinkah matah 06:00 am don ahi (Jn. 19:14). Ajehchu Rome milen milal hon anatoh'u hi jinkah matah'a apat uva pung 10/11 langa kichai jiuva ahi. Hilajja thu kitan nahi gamvaipo in (pretorium) ahin, hiche hi Rome Sepai CO pa Head Qtr ahilou leh sepai langa gamvaipopa Head Qtr ahi. Pilate HQ mong mong chu Caesarea munna Herod in anasah na mun chu ahin, ahin Pilate le amasanga hon Jerusalem hi adeh'a kut leh boina suthip dinga aum ji nadiu, HQ'a amanu ahi.

Judate chun Jesu chu tha mong mong ding agot jeh'ua chu Roman govt khutna alhut'u ngai ahi. ahin amahon kalchuh kut an aneh lou lai'u ahijeh'in Pretorium sung alut pouvin, Pilate joh apot'in ajah'ua "Hiche mipa hehna achunga ipi thu naneijum?" agati.

i. Jesu chu khangse/tolthat (criminal) ahi atiuve (Jn. 18:30). Judate hin Jesu chungchang hi Pilate komma sepai agathum muva chu aseichai sau hitading ahin, amaho geldan na chu Pilate in thu atan lhah pai dinga agellu ahi. Ahinla Pilate in achung thu athah'a jah ding agojoi. Pilate in Jesu khansetna chu amaho dan dungjuija atan dingun asolin, ahin amahon keihon mitha nading dan kanei pouve tin adonbut pajui. Ajeh chu AD 6 apat Rome in Judea gam alah'a chu thina changeija thutan na jong alam mang peh uva gamvai popa apeh'u ahi.

ii. Keima Christa leng kahin atin, Caesar kai peh ding akhamin, kanampiu apuisse'e (Lk. 23:2).

iii. Galilee gama kipanin Juda gam khotinah ahilen, mijouse achohnoh jinge ti ahi (Lk. 23:5). Judea gamvaipo Pilate leh Galilee gamvaipo Herod hi kitoh honlou ahin Jesu chu Galilee mi ahi kiti leh Pilate chun ha engbol inte ti angaito jeh'ua Galilee akon mi ahinchoh nohphah'e (ie. Herod CID dandeu) ti'a aseiju ahin, hinlah agelu banglou tah'in Pilate'in Galilee mi ahi aheth chun alung anom chomin Herod henga asol doh jotai.

2. Herod anga Jesu thu kitan (Lk. 23:8-12). Herod Antipas (AD 4-39) hi Galilee le Perea sunga gamvaipo ahin ama jong hi Jerusalema Kalchuh Kut'a lha dinga hung ahi. Pilate in Jesu Galilee mi ahi jeh'a Herod henga asolna bana ajo achunga themona hunglhung thei ho'a kon akiven dohna ding jong ahi. Herod in Jesu thu tampi adongin ahin Jesun adonbutpoi. Jesun athu kidohna jouse'a adonbut'in, ahin Herod vang kamkhat cha'a adonbut louna hi Herod'in John Baptist'a kon thutah ajah cheng chu ana paidoh'a atha jeh'a chu ipi kisei jongle panna umlou ding ahi jeh'a adonbut lou ahi. Hichun Herod le asepaion tot nopnan amangun Pilate noise nan asoh changpa chu ana engbolui. Amahon Jesu chu pon loupe – Herod'in hop ding mongmonga asem lengvon khat ahin silpeh'un Pilate henga ahin le sol kit taove.

3. Pilate anga Jesu adinkit (thutan kichailhahna) Mtt. 27:15; Mk. 15:6-15; Lk. 23:13-25; Jn. 318:39-19:16). Pilate in thempu pipu ho, houvaipoho leh mipi akou khomin Jesu chu jep'a lhadoh joh dingin aseijoi. Ajehchu Pilate ahi'a Herod ahi'a jong athemona amulhon lou ahi. Chukit leh Kut laile angai monga sohchang khat alhadoh ji mong ahin, Pilate'in Jesu le Barabbas hoijoh kalhadoh dingham ti'a adoh chun mipi chun gucha michom, tolthat Roman douna'a jong natong, khosung sunoh phah jing Barabbas joh chu lhadoh dingle Jesu chu tha dingin asom jouvin ahi.

Hichun Pilate'in Jesu chu jep dingin thu apetai. Pilate gel danna chu Jesu chu jep'a lhadoh ding agot ahi. Ajeh chu ajepna mahaho le Jesu thisan chengchu mu'ule Judaten lungset untin lhadoh ding nom taovinte ati ahi. Jepna kiti hi tijat umtah le gimneitah ahi. Hiteng hileh themo kichanpa hi akeova ki'umsah'a khoma kihena, mitam thim'in alal tenguleh kilha peh'a ajepjiu ahi. Akeh'a Rome gammi hina neilouho chu akung chomcha thinga kistem chu'a chu savun khao tampi kibun, akhaoho leh'a chu sagu ahilouleh thi koika banga kistem kibun ahin, hi'a chu mi ajep leh athih/sagu ho chu phe'a lutna tampi pi aloidoh'a agu leh thajung doh tettut ji ahin, hiti'a kijep hi anasat val ji jeh'in mitam tah athiden ji'un ahi. Hiche hi mikhat akikhai lih masanga athabeina dinga kibol ji ahin, hinlah Pilate'in Jesu chu lungset achan nadinga aboljoh ahi.

Chugoh hilouvin Jesu chu lusuna go hemsitsetna kistem inch 12 chenga sao chu leng lukhuh dan deuin asemin akhuh peh'un, Hichu anat thoh lelina chu akhoh setsah goh hilouvin alu'a thuh tah tah lut ahi. Amahon Jesu chu pumping tenggol khat achoisah'un leng tenggol dan deu leh agah vet hoi ding danin, chuleh hi hiche tenggol la chu alu akhet peh kit jiu ahi. Chugoh hilouva akhut tumuva jong asuh jiu ahi (Mtt. 27:28-30; Jn. 19:1-5).

Chuin Pilate'in ajep jou chun apot kitnin Jesu chung chang themona amulou thu aseito lhonin Jesun ling lukhuh le ponsan dup ksil puma ahung doh'e. Chuin Pilate'in Jesu chu mipite avetsah'in ajah'uva veuvin mihem ahi ati. Jesu chu hiche dinmun na chu apum'a maha'a dim le thabei hel ahin, Pilate in mipite jah'a alungset theina tei diu leh akichat louna tei diuva "Jesu kajep'in, tun hichan hin athoh gimtai, nanghon nagel banguva kichat thei ahipoi, tun kilhadoh jongle ima bolthei taponte" atina'a ase i ahi. "Veovin mihem hi" tihi imacha ahipoi ti'a noise na thucheng amanchah'a ase i ahi (Mtt. 19:1-5). Ahin mipi chun khenbeh'un, Barnabbas lhadoh un ati teitei phatnun khetbeh dingin apedoh tai.

JESU THINGPELLA AKHETBEH'U

(Mtt. 27:27-56; Mk. 15:16-41; Lk. 23:26-47; Jn. 19:19-42)

Synoptic gospel'a kimu dungjuijin Jesu hi khetbeh dinga akipehdoh jouva kijep ahi ati. Hiche'a hin tahsan ni aume. 1) Jesu chu Pilate in lhadoh ding agot na khatvei ajep'a Cross'a akikhet beh ding konna avella ajep kit ahi. 2) Pilate in Jesu chu ajep masanga athu khatvei atanna ajep jouva athu khatvei atan kit'a Cross'a dinga apeh doh ahi. Aninahi alhangpi'a tahsan ahi.

Jesu chu ajepuva, abol genthei uva totnopna aneijouvun Cross'a khetbeh dingin ahinpui taove. Hiti'a khetbeh dinga kipui khat chu ajep, avei, anung, ama'a sepai che'a alaija chu aki khenbeh dingpa chun across akiputna cheji ahi. Hichu apumpi ahilou jongleh alangkhat, adunglanga pa beh akiput ji ahi. Chukitle Cross hi pound 200 chenga gih ji ahin, feet 7-9 sang ahi. Chugoh hilouvin angonga chu ipi jeh'a gotna chang ham kijihna thingpeh chu aki'o kitji, chuleh amasanga chepa chun ipi dinga kihat go ham ti'a ajep asap je'a, ajep, avei le anunga chepa chun ahatmo teng ajep kitjiu ahi. Jesu themmo kichan na chu "Jesu Christa Judate lengpa" tichu ahin, hichu angonga jong aki'o a sapphong jong hi'a chuleh a cross leh'a jong kitah ahi. Khetbeh ding kipui pa chu ahithe i chana khopi mitam na lah'a lampi asaothei pena kipui ji ahi. Hichu midang gihna togom le midang suh kichat ahi'a thilsebol alhom na dinga bol hijia ahi.

Akikhetbeh na ding mun alhun tenguleh a cross tol'a athal'a alup sah'uva, thadingpa chu achunga athal nga lama alup sah'uva hiteng chule loukha le lengpitwi kihala kitem chu anat thoh'ol nadinga adonsah jiu ahi (Mtt. 27:34 cf. Prov. 31:6). Ahin Jesun hichu atep'in don ding anompoi. Cross'a kikhai dingpa chu akhut chonga akil jiu, akeng chu akeng phanga akil jiu ahi. Khatvei vei le akengni chu thihkil khatna akil khomjiu jong aume. Hiti'a chu cross'a kikhet behhi nabehset lou ahi'a asot jep jep leh naheh cheh hi, thoh lel umcheh cheh ji ahi. Roman lekhajih Cicero in "cross'a kikhet beh hi gambol/engbolna mihem chung a kibol thei jouse lah'a asangpen le akhoh pen ahi" ati. Rome ten hiche hi adeh'a gamdang miho le soh ho tha na'a anei jiu ahi. Themmo kichan pa chu cross'a akil beh jou tenguleh khat vei veileh cross chu alekhup jiuva akhup langa Cross chu atun jiu ahi. Cross'a kikhet beh hi migenthei tah'a oltah'a thi sahna ding ahi. Khenkhat loi chu cross'a akikhai lai juva ahinglai sanna ju le va ten aganeh nalai jiu ahi. Khenkhat loi kit chu cross'a sot tah tah ni khat cheng thilha theilouva kikhai jiu ahi.

Cross'a kikhen beh ho chu lelval, haibing, haille, khosih ho sot tahtah athoh uva thijiu ahi. Ajep chu akenguvun adin sah joulou uleh haithei jiu louvu, ahai theina dinguva chu akijet'u ngai, akijet kit uleh anat thoh'u sang kit ji; hijeh'a hi hai theilou hailou theilou, thi theilou, hing thei louva hinkho sot tahtah amanjiu ahi. Hiti'a khat athibai ding ding ati tenguleh akeng aheboh pehjiu, akengin tha apeh louteng haithei ji louva thi jiu ahi (Jn. 19:31,33).

Jesu kikhet behna mun chu Golgotha (Aramiac) Calvary (Latin), hichu lugumun tina ahi. Lugumun tihi amun luguto akilojeh himaithei, ahiloule kikhet behna mun ahijeh'a lugu atam jeh'a

lugu mun kiti himai thei ahi. Gospel hon hiche hi mol/lhang ahi atipouve. Lugumun hi hoilai chet ahi akihepon akisei chen pon, ahin tulai hin Jerusalem'a mun ni ginmo ahi: 1)Goldon's calvary (amun mu dohpa mina kon kiladoh) hichu hi sahlng ahin; 2) Khang thusim'a kisei lhumlam panga Church of Holy sepulchere (houbung lhan muntheng) hiche hi kum jabih 4 apat hung kiseipan ahi.

Jesu luchunga thucheng kitah (placard) akona mudoh theichu Jesu kikhethahna thingpel hi akipel (+) ahin mi phabep tahsan banga T-lim ahipoi. Mikhat thingpela akikhai jouva achunga kitah chu angaija kibol ji ahin, hinlah Jesu chungu vang hi Pilate in thumvei jen lhadoh ding agotna nomlou Juda lamkaiho chungu phulahna le enghot na'a asut ahi. Luke le John'in pao thum (Greek, Latin le Hebrew) paova kisun ahi atilhonin; Gospel liho'a hin jatchom deu cheh'a aseiju hin paochom cheh'a kisun (placard) chu apao ledanu/mandanu kibanglou ahi akilange (tichu Greek'a kijih toh, Latin'a kisun toh, Hebrew'a kisun chu kikhe hiding ahi). Hicheng chu abonahi igopkhoma ahile thingpel chungu kisun chu "HICHE HI NAZARETH JESU JUDATE LENGPA AHI" ti ahi (cf. Mt. 27:37; Mk. 15:26; Lk. 23:38; Jn. 19:19).

JESU THI LEH AKIVUI

Jesun athi masang inthucheng thupi che sagi aseidoh manne

1. "Pa amaho khu ngaidamin" (Lk. 23:34). Cross'a kikil midang ho chun akilbeh ho chu agaosap jiuva sapset thei channa asap set jiu ahin, hinlah Jesu vang amaho chutobang louvin akhenbeh ho joh chu ataopehjon, ngaidam athumpeh jon ahi (cf. Acts. 7:60)

2. "Numei ven nachapa...ven nanu chu" (Jn. 19:26,27). Hiche hi John koma aseidoh ahin, Jesu hi mi'upa ahi to lhonin aman anaote thupheh anei poi. Ajeh chu amahon anatoh (ministry) ah ahepi/lungset pi pouvin tah jong atahsan pouve. Chuleh hiche petna jong chu umlou hidiu ahi jeh'a John jah'a tahsa'a anu Mariam chu ana vetsui dinga Upa hina chu apehdoh ahi.

3. "Tahbeh'a kaseipeh nahi, tuni'a gamloupi'a keimatoh i'umkhom ding ahi" (Lk. 23:43). Hiche hi michonset akoma kikhaipa lungheina akisihna le atahsan na chu Jesun asanpeh na thucheng ahi.

4. "Kadang achah'e" (Jn. 19:28). Jesu athisan ahalom val jeh leh alel beh jeh'a dangchah ah ahi. Lhagao lama labolpan lhagao ngaicha'a dangchah ahi ati.

5. "Eloi Eloi lama sabachthani" Eloi hi Hebrew pao ahin, lama sabachthani hi aramiac ahi. Hichu "Ka Pathen Ka Pathen ibolla neidalhah ham?" tina ahi (Mtt. 27:34; Lk. 15:34). Hiche hi Ps. 22:1 bulhin na ahi. Christan hiche petna chu Pathenin alunghan na jouse chu chonset jouse popa Christa chungu asunlhah'a akinung heikhum jengchu athoh ahin, tonsotna ana ngailu jing pan alunghan khuma ajep'a adalhah jeng chu athoh lel ahi. Hiche hi Jesun chonse te jouse jeh'a athoh ahi.

6. "Akichai tai" (Jn. 19:30) Hiche hin mikhatnin atoh ding jouse ajona thucheng ahi. Houlama seidin mihem khatin houlamto kisaija mopohna atohding jouse atoh chai seinah ahi (Jn. 17:4). natoh jouse kichai ahitai. Hilai akichai tai tihi kaidon lampanga kiseina; Alhinga peh tina jong ahi (Col 3:13,14). Huhhingna natoh jouse kichai ahitai.

7. "Pa nakhutna kalhagao kapei" (Lk. 23:46). Hiche jong hi Ps. 31:5'a kon kilason, Judaten a'ihmut ding konule ataona dinguva achate ana hiljiu Bible chang thucheng ahi. Hiche hi Jesu thu chaina ahitai.

Jesu kikhethah hi Judate phat sim dungjuija nidan thum ahin (Mk. 15:25), hichu Roman phat sim dungjuija jinglam nidan 09:00 ahi. John'in Pilate'in Jesu thu atanhi nidan gup ahi atin (19:14),

John hin Romete phatsima asim ahin, hichu jinglam nidan 06:00 ahi. Nidan 06:00 ma Jesu khetbeh dinga kitan lha'a Golgotha'a nidan 9:00'a kikhenbeh ahi. Hilaija nidan gup kiti jonghi Judate phatsim ahin, hichu nidan 12:00 pm ahi. Nidan 12:00 pm – 03:00 pm chan chu gam jouse chungamu thima ahi.

Jesu thi to lhonnin houin pondal chu kehni akiso'in; Hichu Houin sung mundanga kona muntheng chungnung kiselna pondal chu ahi (Ex. 26:33; Heb. 9:3). Pondal akehin OT thempu chungnung se hita louva Christa vanga Pathen heng naitheina thaneina chu mijousen anei ahitai ti avetsah'e (Heb. 4:14-16; 10:19-22). Mihem hile ato'a patna abokeh tou ding ahin, Pondal achunga pat anoi geija ahung kesuh hin mihemin abokeh hilouva Pathen'in abokeh ahi akilange. Jesu athi'a thilsoh nina chu ling kiho le songpiho pokeh ahin, thilsemho jengjong asuhkhah ahi.

JESU LHANNA AKIVUI

Isaiah. 53:9 a kimu gaothu kisei bangma in Jesu chu lhanna akivui angai jallin, athini nilhuma (06:00 pm) in Arimathea khomi Joseph (Arimathia hi OT'a Ramah or Ramathaim – Zophim; Samuel pennamun; I Sam. 1:1,19; 2:11 chu ahin Jerusalem lhanglum lam mile 15'a um ahi). Joseph hi Juda vaihom Sanhedrin member lah'a khat Jesu Christa seijui ja pang Pathen lenggam ngah jinga um, Judate (member dangho) kihousomna leh athilbol gilouhou joplou ahi. Joseph Nicodimus Pharisee le Sanhadrine member, abul langa Jesu toh kimuto dinga hungpa (Jn. 3:1ff) chun Jesu long damsas chu Pilate henga vui dingin ahung thum lhonin Pilate in Jesu chu athi mong mong tai ti aphotchet to lhonin vui dingin ana phalpeh in ahi.

Roman dan dungjuja songkul tang khat tha dinga thupeh chang chu vui phallou ahin, hinlah a'insung mi in vui dinga athumu leh peh hiji bep ahi. Jesu chung changa vang anu Mariam chu athi chung changa alung ngol den jeh'in hiche lam chu geldoh jou hoi ahipon, asopi ho jong Jerusalem'a aume ti mu ahipon, akinai pi aseijuite cheng la John anu Mariam a'ina dinga puipa tilou adang ajam cheh gam taovin; hiti'a dinmun laitah'a chu Joseph le Nichodimus'in Jesu long damsas chu hangsan tah'a Pilate henga agathum ahi.

Sabbath nikho ima cha bollou ding nikho nisa lhum'a kipan chu lhung ding kon ahitah jeh'in Joseph le Nicodimus chun Jesu long damsas chu gamlha pi'a poman talouvin Judate kivui dan ngai bangin Nichodimus in ahinchoi Myyrh le Aloes thao kihal seer 50 chutoh tupat ponnem in atom un; Chuin akikhetbeehna kom'a um songlhan thah leh koima lupsah na khah lou Joseph in ama dinga akisem'a chun alupsah un, achunga song lentah khat akot khaman aneijun ahi. Hiche kot chu ajingin Pharisee hon Pilate phatsah na noiija mahor anam khumun sentry duty dingin apansah'un ahi. Ajeh chu amaho gella ajole aseijuiten hung gudoh untin athou tai tiuvin te ti'a agellu ahi (Mtt. 27:62-66).

SATURDAY

Jesu Lhanna Acham

1 Pet. 3:18-22'a kimu dungjujin, adeh'a chang 19 na'ah, Jesu chu lhanna acham sungchun lhagaova ache'in kulla kihen lhagaoho thu agahile. Hiche Jesu kulla kihen lhagao ho (Spirit in prison) henga agache hi koiho hiding ham ti kinelna tampi aumin hiche holah'a themkhat veuhite.

1. Kimkhat tahsan danin Jesu hi tahsa'a athi kah lah'a a lhagao chu thikhol khul (Hades) munna gache'a dan chungnung (upper compartment)'a um athi masanga asocha dinga gotsa'a umho, ahi'a achonset nao pumpi soptheng le ngaidam changloulai, Christa athisan jala bou ngaidamna bulhing chang dinga um ngahho henga chu lhadohna natoh akichaitai ti agahetsah'a,

amaho chu chukoma ahinpui doh'a Pathen angsung ahin lhut ahi ti ahi. Ahin hiche hi a text hoitah'a isim le hidinga ginchat umlou khat ahi.

2. Kimkhat kitnin Jesu chu thikhoh khul'a adan ani (both compartment)'a chu che'a amaho dingin Cross'ah athin achonsetnao jouse chungu gotna manchu apeh ahitai; hijeh chun amaho chu second chance, ama akisan thei kitna dinguva huhhingna kot kihon kit agahetsah ahin, koihileh Jesu chu ahuhhingpu le alengpa'a kisan kit'a chu sohcha dinga agasei ahi atiuve. Ahin hiche jong hi dih dinga tahsan umlou ahi. Ajeh chu NT thuhil adeh'a Lk. 16:26 to kikal ahin, gotmun na umho dinga chance umkit talou ahi joi.

3. Kimkhat kitnin Jesu athi kahlah'a chu vantil themmo changsa ho, akihenho, lei onga umho (Jud. 6:7; 2 Pet. 2:4,5; Lk. 8:31) ho henga ache'a amaho dingin themo chana, aman thah na dinga gottotahsa le suhdet ahitai ti aga hetsah'a, atonsot mundingu damun ahi agahetsah ahi atiuve.

Hinlah Bible chang I Pet. 3:18-22 chu isim leh amaho chu Noah nikho laiija thumanglou ho ahiuve (20) ati. Hiche dungjujin geldan jat thum ve kitnute.

1. Achunga kisei point 3 na tahsan hon, hiche'a vantil satan lang pang, lhagao gilouho, lei onga um'a kihenho hi Noah khanga Pathen'in mihem te lung dehat tah'a anga laiija mihem te lungsunga Pathen douna dinga chonna ding lungthim peho, mihem lungsutah ho, huhle jonthanhoi lansah ho, Noah in kum 120 jen Pathen thu asej jeng vanga panna bei sosah ho, Noah insung mi 8 tilou adangse puichavai ho chu ahin, amaho hi Pathen'in kokhuh (abyss)'a ahendena ima boltheilouva akoi ahi. Jesu chu amaho henga chu che'a atonsot munu gotna achandingu agahil ahi atiuve. Hiche'a chu Jesun tahsa'a athi jeng vanga amaho jouse chungu gal jou ahi agahetsah ahi.

2. Kimkhat gel dannin hiche'a miho hi Noah khanglaiija thumang louho, twi'a suhmanga umho, Pathen thu tahsan louho komma chu che'a huhhing natoh chu kajou thengtai; ahin nangho dingin vang chance aumtapoi, natonsot mun dinga chu gotmun ahin, hichu nangho dinga namdet ahitai ti aga hetsah ahi.

3. Kimkhatnin Peter'in asej hi Noah khanglaiija twisanglet masanga Jesu Christa lhagaova mihem te lah'a aga thuhil asej ahi joi atiuve.

Ahin adih pen vang chu Christa chu lhanna acham sungin amot umpon, Noah khanglaiija atahsan louho henga ache'a ti hi muchet ahi.

EASTER SUNDAY

Jesu Lhanna Kon Atho

Jonah ni thum le jan thum ngapi oisunga aum banga, mihem chapa jonghi ni thum le jan thum leigila um ding ahi (Mt. 12:40) anati. Ni thum le jan thum ti'a nikho kisimhi gaothu akiseiteng phatbih khatsung sein'a kimangji ahi. Tekahna'a ni 40 le jan 40 (4:2) kiti banghi khatvei veile lhakhat sanga saojoi sein'a jong kimangji ahi. Ni 3 le jan 3 kitih nikho 3 ahimonge tina'a kimangji ahin; Ni 3 le jan 3 (24X3=72 hours) lhingset hilouva nithum sungin ahopkhah phatsung (tekahna ni 3 chun jan 2 bou ahopkhah thei ahi) sein'a Judaten anaman jiu ahi. Hijeh'a chu Jesu chu Friday nikho'a akikhet beh'a, hapta sunga nimasapen (Sunday) nikho'a athodoh'a ahileh, Judate phatsim dungjuja chu ni 3 le jan 3 ma sim hija ahi. Hichehi hetthem lou jeh'in Jesu hi Wednesday ahiloule Thursday nikho'a kikhenbeh dana hila tampi aumin ahi.

Jesu christa atho kit hi NT doctrine kibul phunna le Christian te tahsan lailungtah ahi. Athodoh thuhi NT a 104 vei akimui. Hijeh'a hi solchah Paulin Christa chu kaithouva umlou hileh kathu hil lhangle jonghi moh ahin, natahsanu jong amoh ahi, nangho tu'a jong chonsetna um jing nalai nahi dinga ahi (I cor. 15:14,17) ati ahi.

Sabbath kichai ni ajing (Sunday) jingkah in Jesu nungjui numeiho: Magdalene Mariam (Jesun asunga kona thila sagi anodohnu ahi (Lk. 8:2); Jacob le Joses nu Mariam (Jn. 19:25'a kisei Cleopas (Alphaeus ti'a jong kisei) inneipi Mariam ti'a kisei; seijui lah'a Jacob neojopa (Mk. 15:40) nu); Zebedee chapate ni nu (Salome (Mk. 15:40); chule anu Mariam (Jn. 19:26) chu Jesu akivui nikho'a thao namtui ima akichoh uva anu man tahlou jeh'u chun Sabbath kichai ni jingpi matah'in athao namtui hou chu achoijun acheuvin, lhansong kikhana song chu kon eitah doh pehdiu ham ti lungdong tah'in akihou lim phei laijun lhansong kihong dohsa (vantil in ahondoh, Jesu atho'a ahungpotna ding hilouva numeiho luttheina dingjoh) le asunga Jesu ana umtalou chu amu'ugin, vantil nin ana kimaito pi'un Jesu tho thu anaseipeh'un, ahin laiija athusei chu ageldoh sah'ui (Lk. 24:7,8). Chuin numei ho chu akile'un somlekhat ho agahetsah'un Peter le John in ahungmu lhonin (Jn. 20:3-9) John in atahsan paije.

JESU THODOH KIT PHOTCHETNA

1. Lhan agoh keuva aum (Mtt. 28:6; Lk. 24:3). Jesu akivui nalhan amitah'a mu'ah numei holeh solchah hon agohkeuva aga mu uhin Jesu chu ana umtapoi ti avetsah'e. Jesu lhanna ana umlou hi thilthum jeh ahi: i) Aloï le paihon along ana lahdoh'u; ii) Amel ma ho nana guh doh'u chuleh iii) Athou doh.

Amasapen hi tahsan hah tah ahi. Ajeh chu seijui ho chu lunglha gamu, jamcheh uva kisel gamu ahitai, ajeh chu Judate kichatna banna Matthew'in lhan ngah ding chu santri akikoije ati kitnun, along chu aguh doh thei louhel dingu ahi. Chuleh Jesu longdamsa chu aguh doh'u bang ahileh athou lou ahi aheddiu, athou monge ti'a ajou aseijuva jepna le thina chan gei chu jou jeh'a athoh ngam lou hel diu ahi.

Abanna ani na pa jong thil hahsa cheh ahi. Ajeh chu ajeh umlouhel ahin, a guard hon jong aphal loudiu ahi. Amaho chu aguh doh uva Jesu chu athoutai ti'a thujou aseigot'u ahi ding jong Jesu thodoh thu kisei chu ajada penin apangun; aguh doh'u bang ahi le athou tai akiti'a chu along chu atholou vetsahna ahin pohdoh diu ahin, chuche chulah aumkitpon ahi.

Hijeh'a chu Jesu chu akigudoh hilouva thoudoh mong monga alhan chu agoh'a um ahi.

2. Vantil in aseï (Mtt. 28:5-6; Lk. 24:5-7). Athodoh jingkah chun vantil teni chun numei ho jah'a "athiho lah'a ibolla ahing nahol'uham? Ama hikoma aumtapoi, aman Galilee gamma aum laiija najah'uva aseibangin athou doh tai" tin aseipeh honne. Lhan agoh keova aumna banna lhan sung mama chun vantil in Jesu thodoh thu aseichen kitne.

3. Midang/seijui ho henga akilah:

a. Mariam Magdalene henga alhan munna (Mk. 16:9; Jn. 20:11-18)

b. Lampi'a numei hohenga (Mtt. 28:9)

c. Emmaus lampia seijui teni henga (Lk. 24:13-34)

d. Peter henga (Lk. 24:34)

e. Thomas jaolouva solchah 10 ho henga (Lk. 24:36-43; Mk. 16:14; Jn. 20:19-25)

f. Thomas jaona somle khat henga (Jn. 20:26-31)

g. Galilee dillen panga seijui 7 ho henga (Jn. 21:1-25)

h. Mi 500 val henga (Galilee mol hidinga ginmo') – I Cor. 15:6 cf. Mtt. 28:16

i. Jacob henga (ICor. 15:7)

j. Vanna akal ding konna solchah ho henga (Acts. 1:3-11)

k. Van akal jouva Paul henga (I Cor. 15:8)

Jesu athodoh jouva chu akimu sah ji mai mai hilouva thamjong atham theijun, hou jong akihou pi'un, ne jong anekhom un, akikhetna maho jong avetsah'in, hichun avetsah chu Cross'a kikhen, lhanna kivui Jesu chu ahi monge ti hi ahi.

4. Solchah/seijui ho hansan dan: Jesu athi'a athodoh masang chun solchah hole anungjui ho chu kicha le tijat na dimma kisel den ahi jingun ahi. Jesu atho'a ahenguva akilah'a Lhagao theng achanu kallhah chun Jesu athou monge ti lhangsap nan gentheina tin cheng le thina atoh soh keijui.

Jesu Thodoh Chung Changa Thihil Dihlou

1.Fraud theory: Jou ahi, thuchavai ahi. Adih lou ahi tiho

2.Swoon theory: Jesu chu thi tahbeh hilou, athi mil maimai; lhandap sung chu aumleh hung hing doh kit ahi tiho: Achuti leh iti lhanna kon hung pot ham? Alou kinu chu poison hija iti hing kit thei ham?

3.Hallucination theory: Seijui ho chun Jesu amu nom u chuleh alunguva thou kit ding ahi tia agel gel jeh'uva atah hilouva alung mituva amu'u ahi. Chuti malah chun Bible in solchah hon amu'u chun atahsang pouvin, Thomas dehdeh chun atham loule tahsan louding ati joi. Seijui hon atahsan lou jeh'un Jesun apholoi (Lk. 24:25. Chuleh iti danna mi 500 lang jenin thilkhat kibanga munkhatna alungmitna amuthei ding ham?

4.Ghost theory: Seijui ho chun Jesu tahtah hilouva alha joh amu'u ahi. Ahin lha/thilha hin phe le gu aneipon, nejong aneipon, don jong adon jipoi (Lk. 24:39,43)

5.Myth theory: Thusim dihrou akhang khanga hung kisei son thusim maimai ahi tiho. Bible hi Pathen in ahaikhum thudih le thutah kisutna ahi.

Athoudoh Jesu Tahsa

1. Phe le gu aneije (Lk. 24:39)
2. Tahsa loupitah aneije (Phil 3:21)
3. Monmang theilou tahsa/thitheilou tahsa (Rom. 6:9)
4. Lhagao tahsa/vou (I Cor. 15:44)
5. Tahsa song/leibang palthei (Jn. 20:19)

Christa Chu Iti Thodoh Ham

1. Pa Pathen thaneina jalla (Acts. 2:23,24; 3:15; 5:20)
2. Christa amatah thaneina jalla (Jn. 2:19; 10:18)
3. Lhagao thenga thaneina jalla (I Pet. 3:18)

JESU VANNA AKAL

Jesu Christa hinkho hi thil kidang li'a seithei ahi. Apen, athokit, Vanna akal le ani veina'a ahung kitding. Vanna akal hi muthei tah'a vanna kile kitna ahi. Leisetna kineosah tah'in naosen na ahung pengin loupitah le galjoutah'in adalha'e.

Jesu Christa chu atho tho'a vanna kalpai louvin atho jou ni 40 jou vin akal bep'e (Acts 1:3). Hiche phatsung chun ama aseijuite henga akilah jingin, Christian tahsan chung changa thu tampi ahil be'in, athoudoh monge ti hoitah'in aphochene. Achaina penna seijuiho henga akilah'a chun Olive molla aman amaho chu vang aboh'in vanna lahtou ahitai (Acts 1:9-12). Jesu Christa meiloma lah tou ahibanga chu khatvei hungkit ding ahi tin vantil nin aseihone (Acts 1:11). Chukit masang ding chun ama Pathen jet lama atoutai (Acts 7:55-56; Rom. 8:34; Eph. 1:20; Col. 3:1).